

尊師 孝親

呂祖直解金剛經

圓通文尼自在光佛  
呂祖純陽大帝 直解

財團法人臺灣省臺中聖賢堂  
聖賢雜誌社 印行



## 孚佑帝君（呂純陽祖師）傳記

孚佑帝君俗稱呂仙祖，即呂洞賓也，世傳以爲八仙之一。修煉至純陽，吾門尊爲祖師，故稱呂純陽祖師。

呂仙祖本唐之一宗人耳，姓李，名隱（幼名紹先），字伯玉，京兆人（注一）。（故治在今之陝西省長安縣）

曾祖父名延之，仕唐任河東節度使。（黃河流經山西省境，自北而南。故通稱山西省境內，黃河以東之地曰河東。唐分天下州縣置爲諸道，每道置採訪，防禦等使。其邊方有寇戎之地，則加以旌節，謂之節度使。）

祖父名渭，官拜禮部侍郎。（禮部爲舊官制，吏、戶、禮、兵、刑、工六部之一，掌五禮之秩及學校貢舉之法。五禮者謂吉、凶、賓、軍、嘉，六部各置侍郎，以貳尙書。）

父名讓，任海州刺史（海州故治在今之江蘇省東海縣，唐時改郡爲州，以刺史爲郡之太守互名，非舊刺史之職也。）讓爲官忠正無私，顯譽載道。一夜讓妻陳氏（一說姓王），夢見白鶴自天而下，飛入帳中，寤遂有娠。至唐德宗

貞元十四年（公元七九八年戊寅歲）四月十四日巳時，祥雲四起，香氣芬馥，俄而仙祖誕生（注二）。是日白鶴群集，經月弗散，鄉人異之。

仙祖生而五官清秀，仙風道骨，鶴頂龜背、虎體龍腮，雙眉入鬢、鳳眼朝天，鼻直聳峰，麟頸露鬚，額闊魁梧，真道家之氣象。年四歲即能誦讀，親戚咸珍愛之。不久到六歲，從師讀書，日誦千言而不倦。一目視十行過眼不忘，舉步詩文，出口成章，聰敏勝人，人皆喚曰「神童」。

及長，斯文秀氣，喜載南陽幘巾，悅穿黃色布衣，樂纏皂帶，喜遨遊山水之間。年華長大，配妻金氏（一說姓劉）生四子，長子名甘、次子名美、三子名豐、四子名克。

仙祖官場無緣，在唐武宗會昌年間（公元八四一年至公元八四六年間）兩舉進士不第。遂遊江州（即今江西省）至廬山。（在江西省九江縣南。此山三面臨水，西臨陸地。萬壑千巖，煙雲彌漫，所謂不見廬山真面目也。）遇火龍真人。（姓鄭，名思遠，號小祝融。世稱神醫，遇人有疾，則書符治之立見其效。）

真人見仙祖骨相清靈，遊心世外，即傳以內丹煉己之訣，製成通天靈劍（即



天遁劍法）：一斷煩惱、二斷色欲、三斷貪瞋。臨別囑曰：「子可居此山以完玉煉，他日聞鐘聲響處，乃得煉金丹之訣。」言訖遂去，時會昌六年丙寅歲（公元八四六年）。

唐宣宗大中十三年己卯歲（公元八五九年），仙祖年已六十二歲。一日在長安酒肆中遇見一道翁，談吐非凡，因揖問姓氏。

道翁曰：「複姓鍾離，名權。」

仙祖曰：「先生非凡人也，願求度世法。」

鍾離曰：「子尚有數年塵緣，明年赴試必得科第。」言訖翩然別去。仙祖若有所失，不得已強赴春闈。是年進士及第且授官，任江州潯陽縣令（即今江西省九江縣）。

唐懿宗咸通二年辛巳歲（公元八六一年），仙祖年六十四歲，宰江州潯陽縣。（隋，九江郡，置潯陽縣於湓口城。唐時郡縣並改曰潯陽，五代時南唐改縣名曰德化，即今江西省九江縣。）六月炎天，遊廬山避暑，忽聞鐘聲響，離老祖從山中出。心思火龍真人囑語，知其時到，即求鍾離老祖指示前途。隱離老祖遂授以三三歸一，金丹妙旨，並教其致仕歸隱。

仙祖遂辭官攜妻隱修於永樂地方（古址在今陝西省北方，米脂縣西），卜築於山洞，時惟存兩口，遂更其姓氏曰「呂」。因在山下，故易其名曰「崑」（崑，同品。說文：山巖也。）時處洞中，因聲其字曰洞賓。其後妻亡而身亦孤，故匾其號曰純陽。遂遊十州、玩三島、歷天下，而富貴功名之私，不足動搖仙祖之念矣，理亂安危之冗舉！

後三遇鍾離老祖，隨之朝訪仙朋，暮謁道侶。日夜相隨，靜坐、談經、說法。鍾離老祖嘗曰：「觀子之功行未滿，需要阿堵之物（唐人語詞，猶云若箇、這箇也。各指其物以爲言，世俗金錢爲阿堵之物），亦可濟世利人，我授爾點石成金奧妙之法如何？」

仙祖問曰：「此石有復原時否？抑永成金焉？」

老祖曰：「三千年後當復原石。」

仙祖曰：「如此誤三千年後之人大矣！」乃固辭不學。

老祖笑曰：「爾此心即大道也。」

遂攜之終南山（主峰在陝西長安縣南）悉傳大道真訣。並勉其結菴靜坐以煉還丹，私心易之臨爐三次不就。鍾離老祖曰：「人心未死，火候不嚴故也。」

必再冥心，人心死則道心見。入於泰定乃可，得泰定則真火自生。」

仙祖在靜坐中常見幻景（受考）：

(1) 一日在靜坐中，忽然自長安歸，見家人皆歿，仙祖心無悼怛，但厚備棺具，已歿者皆復活。

(2) 鬻貨（賣貨）於市，議定其值，市者（買貨的人）翩然只酬其半，仙祖亦無所爭。

(3) 有丐者倚門求施，與以錢物丐者嫌少，再為與之，丐者嫌其遲，嫚罵，仙祖皆禮謝，丐者含笑而去。

(4) 牧羊山中，遇虎來侵。仙祖居群羊之中，虎目舍羊視仙祖，若貪人而賤羊者。仙祖知其不可免，直前當之，虎釋去。

(5) 居深山草舍觀書，俄來一女子，年可十七八，豔光照人，妝飾靚麗。自言歸寧迷路，藉此少憩，夜逼同寢，仙祖竟不為所動。

(6) 出郊歸家，舍中所有，盡為盜席捲殆盡。空無一物，無以供朝夕，仙祖了無慍色。

(7) 躬耕於鋤下，見金數十錠，速掩之不取。又於坊肆買古銅硯歸，磨之金也，

即訪主人還之。

(8)有瘋狂道士在城中市藥，自言服者立死，經旬日不售一服。仙祖異之，因買藥歸，服之無恙。

(9)春江水發，喚渡至中流，風濤掀舞，端坐舟中不動，竟亦無虞。

(10)獨在室中，見奇形怪狀鬼神無數，有欲擊者、有欲殺者，一無所懼，復有夜叉數十械一囚，血肉淋漓哭曰：「汝宿世殺我，急償我命。」仙祖曰：「殺人償命，其又奚辭！」遽索刀繩欲自盡，忽聞空中叱聲，鬼神皆不見。鍾離撫掌曰：「塵心難滅，仙才難遇，吾之求人，甚於人求吾也。吾見汝心君大定，魔光十現而皆不爲所折，必成道矣！」

唐懿宗咸通六年乙酉歲（公元八六五年），仙祖年六十八歲，至黃龍山，（在江西省修水縣。相傳吳黃武年間黃龍現于此，故名。）值 誨機禪升座，仙祖登堂聽講。師問：「座下何人？」。

仙祖曰：「雲水道人。」師曰：「雲盡水乾，何如？」。

仙祖曰：「嘆殺和尚。」師曰：「黃龍出現！」。

仙祖曰：「飛劍斬之。」師大笑曰：「此固不可以口舌爭也！」

又問：「汝功夫如何？」仙祖曰：「一粒粟中藏世界，半升鐺內煮山河。」

禪師曰：「這守尸鬼耳！」

仙祖曰：「爭奈囊儲不死藥，安知與佛有參差。」師指禪杖云：「饒經萬劫，終是落空亡。」仙祖豁然大悟。拜禮辭去。

仙祖既得大道真訣，遂立志度人度世，拯救眾生脫離苦海。自稱「回道人」，歷遊江淮（江蘇、安徽兩省）、鄂（湖北省）、湘（湖南省）、贛（江西省）、兩浙之間（浙江省有浙東、浙西之分，通稱兩浙）。隱現度世，誓願宏大，行化度人。

於咸通十一年庚寅歲（公元八七〇年），仙祖年七十三歲，終於功成德滿，北登醫無閭山，（亦作醫巫閭山，在遼寧省北鎮縣西。今山上有仙人巖，孤石峭拔而秀，在巖石上鐫有呂仙祖像，又名曰：「呂公巖」，相傳爲呂仙祖飛昇之處。）白日飛昇而歸仙位，登上大羅之天。（道家以大羅天爲最高之天，即無極天也。）

仙祖既登大羅之天，猶以抱懷度眾之心。自唐而宋、而元、而明、而清、而中華民國，無世不出，嘗顯其仙蹟。世人感仙祖度世之德，各地立廟祀之，

迄今千餘載，香火不絕。

俗傳詞曲中有「呂洞賓三戲白牡丹」者，係宋朝之顏洞賓而非唐朝之呂洞也。世人只知呂仙祖字洞賓，不知宋朝有散仙亦字洞賓。俗人不察竟誣加之，而後人亦不查證有關文獻，盲從其傳指呂仙祖爲風流之仙，此種荒誕無稽之謬論。如此侮慢仙佛，罪固難赦，況敢望神格外之恩。請讀者應多多考證有關文獻。進而希望戲劇家改正此一大錯誤，以免誤傳於後代爲幸。

根據王文貞公的「崇簡冬夜箋記」中記載：「前清康熙年間，呂仙祖向臨其家壇，乩辨此事云：『世傳余三戲白牡丹事，乃宋朝散仙顏洞賓所爲。』前後互爲改正，是可明瞭。」

# 呂祖直解金剛經 目錄

重印金剛經直解引言	.....	一
重刻金剛經直解序	.....	二
金剛經直解後序	.....	四
金剛經直解序	.....	五
金剛經啓請	.....	七
金剛般若波羅密經	.....	一二
法會因由分第一	※般若音鉢惹下倣此	一二
善現啓請分第二	※說法聚會由此起因	一二
大乘正宗分第三	※善現長老啓請佛訓	一三
妙行無住分第四	※最大之乘至正之宗	一六
如理實見分第五	※奧妙之行本無住著	一七
正信希有分第六	※自如之理乃見真實	二〇
無得無說分第七	※生正信心最爲希有	二一
依法出生分第八	※空則無得寂則無說	二四
	※諸佛之法依此生出	二五



一相無相分第九

※只此一相本自無形

.....

二七

莊嚴淨土分第十

※成就莊嚴淨明心地

.....

三一

無爲福勝分第十一

※修無爲福勝於布施

.....

三三

尊重正教分第十二

※受持正教天人尊重

.....

三四

如法受持分第十三

※當如此法承受行持

.....

三五

離相寂滅分第十四

※離諸形相自得寂滅

.....

三八

持經功德分第十五

※受持此經功德無量

.....

四四

能淨業障分第十六

※若能清淨業障盡消

.....

四七

究竟無我分第十七

※成佛究竟本無我相

.....

四九

一體同觀分第十八

※萬法歸一更無異觀

.....

五五

法界通化分第十九

※法身遍界通化無邊

.....

五七

離色離相分第二十

※色相皆妄離妄見性

.....

五九

非說所說分第二十一

※法無可說所說非法

.....

六〇

無法可得分第二十二

※悟性空故無法可得

.....

六二

淨心行善分第二十三

※以清淨心行諸善法

.....

六三

福智無比分第二十四

※福智甚大無物可比

.....

六四

化無所化分第二十五	※聖凡同性化無所化	六六
法身非相分第二十六	※清淨法身非屬相貌	六七
無斷無減分第二十七	※依法修持不應斷滅	六九
不受不貪分第二十八	※一塵不染何貪何受	七〇
威儀寂淨分第二十九	※真性寂靜不假威儀	七一
一合理相分第三十	※一合之理實無有相	七二
知見不生分第三十一	※如是知見法相不生	七四
應化非真分第三十二	※應現設化亦非真實	七五
金剛咒		七七
般若波羅密多心經		七九
呂祖師降三十二次偈		八五
西方寶筏		九三
節錄		九五
大悲咒		一〇〇
觀音大士咒		一〇三



## 重印金剛經直解引言

夫釋迦說法四十九年。傳經幾同煙海。而起人信仰。最當此土之機者。則莫金剛經若也。第註之者多家。非專務高深。不合於初學。即經註參錯。不適於讀誦。美中不足。在所難免。近得呂祖之註本。見其文辭通利。燦然為一家之言。註講透闢。兼適於高下之資。而又註列經後。讀誦便宜。洵屬善本。爰集貲同人。重印五千本行世。俾大乘經典。流佈方來。凡屬含靈。普沾法雨。詎非懿事歟。斯本舊名不一。此次重印。顏之曰。呂祖金剛經直解。遵自序中請直解於予。及王○川序中。直解而外。難得善本之語也。書成。略誌其緣起如此。

歲在戊寅年荷月新民後學李合乾序於吉林吉光施醫館時年八十

## 重刻金剛經直解序

昔世尊在祇樹園中。與三千諸衆。講明無相真空妙道。為萬劫不壞之體。故經名金剛。蓋五行之中。惟金難磨滅。而金之煉而為剛者尤愈。經之不可磨滅者。非此胡能為比。金剛之義大矣哉。凡歷代有志入道者。孰不以此經為修心之寶筏。第此經義甚精微。透者罕覩。惟宋代普菴祖師。作此經三十二分頌。字字精確。誠能窺見一斑。及後解本屢出。皆得其義之半。而全體所在。未能問津。然此義亦未可遽為淺人道也。惟條辨精詳。得其入門之方。不致為岐解所誤。亦可漸入於室。則呂純陽壇上所註之直解。非入門者所先事歟。此經直解而外。難得善本。故去歲降鸞。有湯生求為及門龍子之弟保病。仙即舉此書相授。令其重刻。印送五千卷。廣布於人。俾世間善男信女。得此書旨趣。瞭如指掌。方知心性本自清淨。本自具足。本不生滅。本不搖動。自性本生萬法。萬法本歸自性。所謂禪定及戒定慧。

種種諸法。皆歸一貫。是知般若波羅密多。無上無無等無等等之法也。予性愚。敢言大道。第花飛石點。物猶知感。況予生佛後功德所存。敢外此經之義乎。惠能禪師云。迷時師度。醒時自度。可見有志大道者。以誦經為師度。以明心為自度可耳。直解之指迷。直解之度人也。人何可以不自愛此心。予何敢以不序此經。

○○戊子年六月初五日

○川好道子敬撰

# 金剛經直解後序

釋道二教首重之書。曰 玉皇經。曰 金剛經。上乘之士。悟其旨趣。可以入聖超凡。初學之人。解其文辭。亦可以檢身寡過。予於乙卯歲。發願註解玉皇經。蒙 文帝 祖師分曰。臨壇。校正明確。已經鏤印行世。至 金剛經。為我佛之心證。歷來高衲。累有訓詁。然不離棒喝堂參窠臼。閱者未免茫然。復蒙 祖師發慈悲心。字釋句註。灑灑萬餘言。靡不明白顯亮。向之茫然者。瞭如指掌。洵入聖超凡。檢身寡過之一助也。茲特捐貲付梓。祇祈普度人天。並非希求福利。願海內善信。因文究義。共證無上菩提。庶不負我 佛傳經之心。與我 祖師註經之心也夫。

時

大清龍飛乾隆元年歲在丙辰三月九日

賜進入出身御前侍衛江南左北葦蕩海防河營參將加一級紀錄四次  
弟子黃正元敬梓



## 金剛經直解序

從古聖人之書。皆所以垂教也。而統智愚聖凡。胎卵溼化。而胥度之者。莫如金剛經。是經也。以無念為宗。以離相為旨。以斷除貪妄為功夫。以清淨涅槃為究竟。誠昏衢之巨燭。苦海之慈航也。自西域傳入中華。上自王侯紳士。下迄牧豎樵夫。靡不家置一編。頂禮而供奉之。較四書六經。倍加尊重。然雖明衣潔裳。淨體端容。敲碎木魚。而口之所誦。非心之所知。目之所睹。非意之所會。如入暗室。不見一物。如遊蠻邦。莫辨何言。亦安能起大堅固。生大智慧。而臻無上菩提之岸哉。門下士黃子正元。（閩總戎號泰一）憫世人但誦經文。不曉經義。請直解於予。予瞿然曰。此經為我佛之傳燈。微妙秘密。予何人斯。敢以蠡測之見。妄語高深哉。黃子請甚力。不獲辭。因節取昔賢之論。而增損之。謬參己見而串合之。前載註語。既字註而句釋。後列講

旨。復縷晰而條分。或過遞下卷。不凌不躐。或迴顧上意。不漏不遺。務使口吻順適。脈絡貫通。俾誦者。對其文。曉其義。如親歷祇樹園中。見佛與空生。娓娓問答。向之在暗室者。處處開明。向之遊蠻邦者。言言盡解。亦一大快事也。蓋佛書談空。儒書言實。解佛之書。以解儒書者解之。則理順詞通。後學之人。一見了然。易於遵循。若於經中之章節問答起伏聯貫處。概置不講。而多引棒喝堂參之語。以作訓詁。如鏡中花。探之不得。如水中月。捉之不能。揆之我

佛傳經之心。斷不如是。茲刻壽世。必有尋文究義。而得阿耨多羅三藐三菩提者。黃子之功。將與佛土並永。豈特勝於三千大千世界七寶以用布施者哉。 時

大清乾隆元年律次夾鐘之月純陽子沐手敬序

# 金剛經啓請

若有人受持金剛經者。先須至心焚香。念祝香等真言。然後啓請。佛祖。及須菩提尊者。記經阿難尊者。八金剛。四菩薩。觀世音菩薩。文尼自在光佛。正心虔誦。利賴無窮。

## 祝香真言※先三上香

爐香乍爇。法界蒙熏。諸佛海會悉遙聞。隨處結祥雲。誠意方慇。諸佛現金身。

南無香雲蓋菩薩摩訶薩※三稱

## 淨口業真言

修利修利。摩訶修利。修修利。薩婆訶。

## 淨三業真言

唵。娑<sub>(梭音)</sub>嚩<sub>(娃音)</sub>婆嚩<sub>(述音)</sub>𑖀<sub>(陀音)</sub>𑖦<sub>(酣音)</sub>。𑖀<sub>(陀音)</sub>𑖦<sub>(酣音)</sub>。達摩娑嚩。娑嚩。𑖀<sub>(陀音)</sub>𑖦<sub>(酣音)</sub>。

## 安土地真言

南無三滿多。母（沒音）馱（陀音）喃。 唵。 度嚕度嚕。 地（寨音）  
尾（尼音）娑婆訶。

## 普供養真言

唵。 誡（耶音）誡曩（囊上聲）三婆嚩。 鞞（娃音）日（子音）囉（捌音）  
斛（畔音）。

## 奉請

琉璃世界。寶蓋會中金蓮遍沙界之九品。清淨現本來之法身。  
化百千萬億劫。立釋教之主宰。演金剛不朽之奧妙。明善惡設  
幽冥之教主。傳無上大乘。德化群迷。如天地長舌。法門道祖。  
。大聖大仁。大慈大悲。西域大丈夫。釋迦如來牟尼真佛。

## 奉請

南無慧命啓經。善吉善現。樂阿蘭那。第一離欲阿羅漢尊者。  
菩提薩埵摩訶薩。

奉請

南無廣大多聞。善述至道。億載敷教尊者。菩提薩埵摩訶薩。

奉請

南無青除災金剛

南無辟毒 金剛

南無黃隨求金剛

南無白淨水金剛

南無赤聲火金剛

南無定持災金剛

南無紫賢 金剛

南無大神 金剛

奉請

南無金剛眷菩薩

南無金剛索菩薩

南無金剛愛菩薩

南無金剛語菩薩

奉請※先上香三炷

青華聖境。東極上宮。十方化號度衆生。百億瑞光瞻妙相。即隨機而赴感。由誓願之弘深。九色蓮花。作慈航之彼岸。一枝楊柳。開甘露之法門。無量度人。大慈仁者。大悲大願。大聖

大慈。太乙尋聲救苦天尊。廣大靈感觀世音菩薩。

奉請

先天太史。三教正宗。玄天啓教。正法天尊。我人悉化。萬劫真宰。行法渡世。無為教主。九天上帝。三界師王。聖神無雙。宏法天尊。大悲大慈。大聖大仁。玄門廣法天尊。圓通文尼自在光佛。

發願文

稽首三界尊。皈依十方佛。  
我今發宏願。持此金剛經。  
上報四重恩。下濟三途苦。  
若有見聞者。悉發菩提心。  
盡此一報身。同生極樂國。

云何梵

云何得長壽。金剛不壞身。

復以何因緣。得大堅固力。  
云何於此經。究竟到彼岸。  
願佛開微密。廣為衆生說。

### 開經偈

無上甚深微妙法。百千萬劫難遭遇。  
我今見聞得受持。願解如來真實義。



# 金剛經

圓通文尼自在光佛直解 永豐俞 梅早春校正

金剛般若波羅密經 ※般若音鉢惹下倣此

〔註〕金剛。金中之剛。利而能斷之意。般若，智慧也。波羅密到彼岸也，即諸佛菩薩超脫究竟之地。經，徑也。言此經爲修行之徑路也。

石天基註。凡係如來語句用圈○。須菩提語句用黑圈●。阿難結集語用尖圈△。問答起語用連點：。語句分明。便於初學。

## 法會因由分第一 ※說法聚會由此起因

如是我聞△一時佛在舍衛國△祇樹給孤獨園△與大比丘衆△千二百五十人俱△爾時世尊食時△著衣持鉢△入舍衛大城。乞食於其城中。次第乞已。還至本處。飯食訖。收衣鉢。洗足已。敷座而坐。※祇音岐比丘音比丘著音酌如音予下倣此鉢音撥飯食音反四

〔註〕如是，指全經而言。我，阿難自稱也。言此經之所云。乃

我親聞於佛者也。佛，教主之稱。舍衛國，波斯匿王所居，樹爲匿王太子祇陀手種，故曰祇樹。給孤獨，名須達拏，樂善好施，人皆稱爲孤獨長者。須達深重佛教，向祇陀借園建精舍，用黃金布地，請佛說法，故佛常住園中。比丘，乞士也。上乞法於諸佛菩薩，下乞食於善信之謂。世尊，佛號也，三界共仰之意。敷，排布也。

【講】阿難說，我向者嘗聞我佛如來，在舍衛國祇樹給孤獨長者園中，座下乞士，共一千二百五十人。時方正午，當進食之際，佛乃著和柔忍辱之衣，持四天王所獻之鉢，率諸大眾，於舍衛城中乞食。不越貧而從富，不捨賤而從貴，平等無相，次第乞已，還至園中，飯食訖，收衣鉢，洗足畢，排布高座而坐焉。

### 善現啓請分第二

※善現長老啓請佛訓

時長老須菩提△在大衆中△即從座起偏袒右肩△右膝著地合掌恭敬而白佛言△希有世尊。如來善護念諸菩薩。善付囑諸菩薩。世

尊・善男子・善女人・發阿耨多羅三藐三菩提心・云何應住・云何降伏其心・佛言△善哉。善哉。須菩提。如汝所說。如來善護念諸菩薩。善付囑諸菩薩。汝今諦聽。當為汝說。善男子。善女人。發阿耨多羅三藐三菩提心。應如是住。如是降伏其心。唯然・世尊・願樂欲聞

※長老音掌老。如來音予來。阿耨音窩辱。藐音渺。應音英。降音祥。諦音帝。為音位。後凡去聲為字，俱讀位。唯音委。樂音要。下倣此

【註】長老，年高有德之稱。梵語須菩提，華言善現，一名空生。左為邪道，右為正道，故偏袒右肩，右膝著地。合掌，心合於道，道合於心也。白，啓也。希，少也。希有世尊，先嘆其少有，又呼佛號也，下倣此。如來，佛之通稱，謂真性自如，隨所來而現也。菩，覺也。薩，情也。義理先具，能覺一切有情之意。阿，無也。耨多羅，上也。三，正也。藐，等也。三菩提，正覺也。云何應住者，言此心當住於何處。諦，詳審也。唯然，既諾

而復是其言也。

【講】當佛敷座而坐之時，有長老名須菩提者，於大眾中，從座而起，袒其右肩，屈其右膝，合掌恭敬，白佛曰。希有哉，世尊，座下諸菩薩有一千二百五十人，不爲不多，倘如來不護持眷念，俾信受是法，則外誘得以擾亂之矣。不付委囑託，俾奉行是法，則宗傳有時而斷絕矣。但眞性雖人同具，而妄念未易消除。三千大千之內，若有善男子，善女子，發無上正等正覺之心者，此心當住於何處，方得降伏其妄念乎。佛曰，善哉善哉，須菩提，汝云如來善教諸菩薩，此言深合我心。汝其詳審靜聽，當爲汝說除妄之道。世間若有善男子，善女人，發無上正等正覺之心者，當絕去外緣，一塵不染，念念常住清淨，則能自見其性，而降伏其心矣。維時須菩提，心開意解，曰唯，曰然，曰世尊，曰願樂欲聞，極致其領會而讚歎焉。

大乘正宗分第三 ※最大之乘至正之宗

佛告△須菩提。諸菩薩摩訶薩。應如是降伏其心。所有一切衆生之類。若卵生。若胎生。若溼生。若化生。若有色。若無色。若有想。若無想。若非有想。非無想。我皆令入無餘涅槃而滅度之。如是滅度。無量無數。無邊衆生。實無衆生。得滅度者。何以故。須菩提。若菩薩有我相。人相。衆生相。壽者相。即非菩薩。※一切音一砌令音伶涅槃音捏盤無量音無亮相音像下倣此

【註】摩訶薩，梵語也。即華言心體廣大。不可測量之意。卵生，禽鳥也。胎生，人與獸也。溼生，水中鱗甲也。化生，蠅蚊等類也。有色，謂但有色聲，而無情欲也。無色，謂但有靈識，而無色身也。有想，方寸之中，尚有計慮也。無想，靜涵萬有，一念不動也。非有想非無想，雖一念不動，不似木石之無知也。此五者，皆天上之人。無餘，此外無餘也。涅，不生也。槃，不死也。滅度者，滅盡一切諸相，而度化之也。

【講】須菩提聞佛所說，心意開解。佛於是復告之曰，須菩提，諸菩薩性量廣大，應如是降伏其心固已。然我之心，即人物之心，所有一切眾生之類，若世間之卵生，胎生，溼生，化生，天上之有色，無色，有想，無想，非有想，非無想，雖品類不同，見地各異，我皆令其不生不死，消滅其種種諸相而度化之，使之亦如是降伏其心焉。如是無盡量，無數目。無邊界之眾生，悉皆滅度，亦眾生之自滅自度，於我何功哉，所以者何。蓋眾生之滅度，若歸功於我，則此心便有所著，而不免於四相之累矣。如心著於貪一邊，則爲己計私，而有我相。心著於瞋一邊，則分別爾汝，而有人相。心著於癡一邊，則願生諸天，而有眾生相。心著於愛一邊，則希冀長年，而有壽者相。有此四相，尙得謂之菩薩乎。

#### 妙行無住分第四

※奧妙之行本無住著

復次須菩提。菩薩於法應無所住行於布施。所謂不住色布施。不

住聲香味觸法布施。須菩提。菩薩應如是布施。不住於相。何以故。若菩薩不住相布施。其福德不可思量。須菩提。於意云何。東方虛空。可思量不。不也。世尊。須菩提。南西北方。四維上下虛空。可思量不。不也。世尊。須菩提。菩薩無住相布施。福德亦復如是不可思量。須菩提。菩薩但應如所教住。

※行音形。布施音布世。凡問之不字音否，凡答之不字音弗。下倣此

【註】復次，謂再編次，佛與須菩提問答之言也。菩薩於法之法，指心與身之所運用酬酢者而言。住，執著也。布，普也。施，散也。色，形像。聲，音樂。香，芬芳之氣。味，烹炮之品。觸，動也。或云，男女之欲亦通。法者，事物之則也。諸法皆緣心生，故屬於意。

【講】佛承上無相之義，又告須菩提曰。菩薩於一切心之所運用，身之所酬酢者，皆當無所住著，而布施爲尤甚。何也。凡夫布施，往往希求利益，如目之於色，耳之於聲，鼻之於香，舌之於



味，身之於觸，意之於法，一不如其所欲，則必布施以求快其所欲，此住相布施也。菩薩六根清淨，無諸欲之求，惟以法施，利益一切眾生，如水在地中，行所無事，所謂不住相布施也。須菩提。菩薩布施，必須如是無六塵之累，方爲眞布施，方獲大利益。此何故哉。蓋財施爲凡，法施爲聖，菩薩無住相布施，毫無希冀之心，縱脫生死苦，受大快樂，歷萬劫而不毀，超三界以長存，其福德雖大，亦聽其自然，實不可思維較量。以一經思量，則此心便住於相，而福德反小矣。夫福德固不可思量，而思量亦屬無益。吾試問爾。東方虛空，可謂大矣，爾思量不。須菩提曰，此等虛空之處，想之何用，吾不思量也。佛又曰，南西北方，四維上下虛空，尤爲大矣，爾思量不。須菩提曰，此等虛空之處，想之亦無用，吾不思量也。佛曰，爾知虛空不可思量，則知菩薩之無住相布施，其福德亦如虛空一般，斷不可思量也。但須依吾之教，心住於無相，則自獲超證矣。

## 如理實見分第五

※自如之理乃見真實

須菩提。於意云何。可以身相見如來不。不也。世尊。不可以身相得見如來。何以故。如來所說身相。即非身相。佛告須菩提。凡所有相。皆是虛妄。若見諸相非相。即見如來。

〔註〕於意云何，發問之詞。身相，謂現具之色身，見，猶看也，非相見之見。

〔講〕佛謂須菩提曰，汝知福德不可思量，則布施當不住於相明矣，豈獨布施爲然哉。即吾現具之形體，亦非真實。吾試問爾，可以執四大色身，遂謂如來在是不。須菩提曰，色身滯於官骸，佛與凡夫無異，殆不可以身相見如來也，何以故。佛以法爲身，清清淨淨，如太虛之不著形跡，雖有身相，而實無身相，今如來所說身相，是法身，非色身也。法身可見如來，色身豈可見如來乎。佛曰。須菩提，爾之言是也，凡人所有之相，皆屬虛妄，虛則不實，妄則不真，以不實不真之相，欲見如來，譬若認外寇作

家人，終無是處。若人能見諸相非相，則見色身中有法身，而如來在是矣。

### 正信希有分第六

※生正信心最爲希有

須菩提白佛言△世尊・頗有衆生・得聞如是言說章句・生實信不・佛告△須菩提。莫作是說。如來滅後。後五百歲。有持戒修福者。於此章句。能生信心。以此為實。當知是人。不於一佛二佛三四五佛。而種善根。已於無量千萬佛所。種諸善根。聞是章句。乃至一念生淨信者。須菩提。如來悉知悉見。是諸衆生。得如是無量福德。何以故。是諸衆生。無復我相人相衆生相。壽者相。無法相。亦無非法相。何以故。是諸衆生。若心取相。即為著我人衆生壽者。若取法相。即著我人衆生壽者。何以故。若取非法相。即著我人衆生壽者。是故不應取法。不應取非法。以是義故。如來常說。汝等比丘。知我說法。如筏喻者。法尚應捨。何況非法。※種，音眾。

【註】如是言說章句，指上數章而言。五百歲，約舉之詞，言其遠也。持戒，諸惡莫作。修福，眾善奉行。以此爲實，確信不疑也。種善根，即持戒修福之意。淨信者，心常清淨。而篤信之也。如來悉知悉見，心合於佛。佛合於心也。無法相，萬法皆空。無非法相，外緣悉淨。如來常說云者，蓋古佛有是語，而佛復述之也。筏，船也。喻，譬也。佛法濟度眾生，譬以船渡人也。

【講】須菩提恐佛滅後，傳法無人，後來眾生，未能生信。故白佛曰：世尊以大慈之心。著希有之論，座下諸比丘，固莫不尊奉矣。倘佛涅槃之後，後來眾生，得聞如是言說章句，未知亦能生實信之心否。佛曰：須菩提，性體常明，心燈不滅，爾莫作是說也。蓋此言說章句，至微至妙，即如來滅後，至五百餘歲之遠，猶有持淨戒，修天福之人，以此爲真實妙諦，而確信不疑者。夫能確信於五百餘歲之後，則其善根，必預種於五百餘歲之前，當知是人，不於一佛二佛三四五佛而種善根。已於無量千萬佛所，

種諸善根。見佛多，聞法多，修行多也。不但持戒修福者，善根不可勝記，即世間眾生，聞是章句，乃至一念之間，生淨信心。此心便與如來相合，如親受教於如來一般。如來佛慧佛眼，悉知而悉見之，是諸眾生，所得福德，如是無量，此何故哉，蓋已得生法二空之妙義故也。是諸眾生，雖止一念淨信，而此一念已無復有我相人相眾生相壽者相，是生空也。無法相，亦無非法相，是法空也。生法二空，其義云何，蓋不著相也。是諸眾生，若心取相，即爲執生，便著我人眾生壽者。若取法相，即爲執法，便著我人眾生壽者。若取非法相，亦爲執法，亦著我人眾生壽者。生相固不可執，法與非法亦不可執如此。是故持戒修福之人，須令此心空空洞洞，一物不有，不應取法相，亦不應取非法相，此種義理，最爲微妙。所以古之如來，常謂大眾曰：爾等諸比丘，知我以法度人，譬如以筏濟渡，人既登岸，筏即無用，人能了悟，法亦無用矣。由此觀之，法尚應捨，何況非法之外道乎。

## 無得無說分第七

※空則無得寂則無說

須菩提。於意云何。如來得阿耨多羅三藐三菩提耶。如來有所說法耶。須菩提言。如我解佛所說義。無有定法名阿耨多羅三藐三菩提。亦無有定法如來可說。何以故。如來所說法。皆不可取。不可說。非法。非非法。所以者何。一切賢聖。皆以無為法而有差別。※差音雌。

【註】得阿耨多羅三藐三菩提耶者，了卻真空，無定法可得也。有所說法耶者，因人而教，無定法可說也。不可取，不可以色相取。不可說，不可以口舌說。非法，雖有而卻無。非非法，雖無而卻有。皆以之，以字，作用字解。

【講】佛告須菩提曰，吾教固以無上菩提為第一義。然或由持戒而得之，或由禪定而得之，功夫不同，獲效各別。爾之意以為，如來於無上菩提，有一定之法可得耶。佛門廣大，固不擇人而教，然智者與之言深，愚者與之言淺，資稟不齊，施誨亦異，爾之

意以爲，如來有一定之法可說耶。須菩提答曰，如我解佛所說義，知佛以無上菩提之義自修，無一定之法可名。以無上菩提之義教人，亦無一定之法可說也。何以故。如來所說之法，可以性修，而不可以色相取。可以心悟，而不可以口舌說。以爲有法耶，雖有而不滯於有。以爲無法耶，雖無而不淪於無。此所以無一定之法可得也。所以者何。法本無爲，自古賢聖，皆用無爲之法誨人，而淺者見淺，深者見深，不能不有差別，此所以無一定之法可說也。

### 依法出生分第八

※諸佛之法依此生出

須菩提。於意云何。若人滿三千大千世界七寶。以用布施。是人所得福德。寧為多不。須菩提言甚多。世尊。何以故。是福德。即非福德性。是故如來說福德多。若復有人。於此經中受持。乃至四句偈等為他人說。其福勝彼。何以故。須菩提。一切諸佛。及諸佛阿耨多羅三藐三菩提法。皆從此經出。須菩提。所謂佛法

者。即非佛法※偈音忌下倣此

【註】普天之下，謂之小世界。一千小世界，謂之小千。一千小千世界，謂之中千。一千中千世界，謂之大千。其實一大千耳，斯爲三千大千世界。七寶；琉璃，玻璃，珍珠，瑪瑙，珊瑚，金，銀。福德，修布施之德，享現在之福。福德性，修性中之德，性彌六合，其受福亦如是也。四句偈。當指無我相人相眾生相壽者相。方有著落，謂此偈不必說破者，似屬空滑，不可從。

【講】前言法無爲矣。佛意欲顯無爲之福，乃先與之論有盡之福。因設問曰：須菩提，於意云何。若有人於此，用三千大千世界之七寶，以爲布施，是人所得福德，寧爲多否。須菩提曰：凡人布施，原欲希求利益，所得福德，豈有不欲其多。但所得者，身外之福德，而非性中之福德也，何以故。聚寶布施，不過借物而修，物有限，而其福德亦有限，非性中之福德可比。然如來猶諄諄以是人之福德爲問者，以彼所得雖多，猶可以數記故也。佛曰



：須菩提，爾言誠然也。藉物而修，不若率性而修，而性修之法，不外此經。若復有人於此經中，受之不忘於心，持之不厭其久，乃至四句偈等，爲他人宣說。不但覺一己之性，且將覺億萬人之性。其福德豈不勝彼布施之福德乎。何以故。蓋此經乃修行之徑路。凡一切諸佛，及諸佛無上菩提之法，皆從此出。夫無上菩提之法，即佛法也，而佛法豈可泥乎。所謂佛法者，本來無有，不過假此開悟眾生耳，寧有真實之佛法哉。

### 一相無相分第九

※只此一相本自無形

須菩提。於意云何。須陀洹。能作是念。我得須陀洹果不。須菩提言：不也。世尊。何以故。須陀洹。名為入流。而無所入。不入色聲香味觸法。是名須陀洹。須菩提。於意云何。斯陀含。能作是念。我得斯陀含果不。須菩提言：不也。世尊。何以故。斯陀含。名一往來。而實無往來。是名斯陀含。須菩提。於意云何。阿那含。能作是念。我得阿那含果不。須菩提言：不也。世尊。

・何以故・阿那含・名為不來・而實無不來・是故名阿那含・須菩提。於意云何。阿羅漢。能作是念。我得阿羅漢道不。須菩提言：不也。世尊。何以故。實無有法。名阿羅漢。世尊。若阿羅漢作是念。我得阿羅漢道。即為著我人衆生壽者。世尊。佛說我得無諍三昧。人中最為第一。是第一離欲阿羅漢。世尊。我不作是念。我是離欲阿羅漢。世尊。我若作是念。我得阿羅漢道。世尊則不說須菩提是樂阿蘭那行者。以須菩提實無所行。而名須菩提是樂阿蘭那行。※洹，音完。那，音奴

【註】能作是念，謂尙萌得道之念也。前四我字，乃代須陀洹等，設想之詞，非佛自稱也。梵語須陀洹，華言預流，謂初入眞流也。梵語斯陀含，華言一來，謂色身一住天上，一生人間也。梵語阿那含，華言不來，謂不來受生慾界也。梵語阿羅漢，華言無生，謂相滅生盡也。無諍，毫無爭競之意。梵語三昧，華言正見，謂遠離邪見也。樂，好也。阿蘭那，即無諍也。樂阿蘭那行者

，蓋佛嘗有是語，而須菩提舉以爲證也。

【講】前言無爲之法，不可取，不可說。則諸菩薩修行，俱當以無念爲宗，而不可存得果之心。故佛設問曰：吾教大眾，修阿羅漢道者，大約有四等。曰，須陀洹。曰，斯陀含。曰，阿那含。曰，阿羅漢。用功不同，得果亦異。須菩提，於意云何。須陀洹，當修行之時，若預作得果之念，使得須陀洹果否，須菩提曰。不也世尊。何以故，須陀洹得預聖人之流，名爲入流，而心無所得，不著入流之相，不入色聲香味觸法之六塵境界，謂之須陀洹，其以是與佛曰。須菩提。於意云何。斯陀含，當修行之時，若預作得果之念，使得斯陀含果否，須菩提曰。不也世尊。何以故，斯陀含色身一往住天上，一來生人間，雖曰一往一來而心無所得，不著生滅之相，實無往來，謂之斯陀含，其以是與佛曰。須菩提。於意云何。阿那含，當修行之時，若預作得果之念，使得阿那含果否，須菩提曰。不也世尊。何以故，阿那含，內無欲心

，外無欲境，不來世界受生，名爲不來，而心無所得，不著不來之相謂之阿那含，其以是與佛曰。須菩提。於意云何。阿羅漢，當修行之時，若預作得果之念，便得阿羅漢道否，須菩提曰。不也。世尊。何以故，阿羅漢，萬緣悉淨，無煩惱可斷，無貪瞋可離，無得果之心也。既無得果之心，即無道可得，無法可名矣，謂之阿羅漢，其以是與。世尊。若此四等之阿羅漢，稍萌所得於心，謂我之修行，可以得阿羅漢道，即著我人眾生壽者四相，尙得謂之阿羅漢乎。即如弟子當日，曾蒙我佛過許，謂我與人無競，與物無忤，遠離邪見，得無諍三昧，在大眾之中，極爲難得，是第一離欲阿羅漢。世尊所以許我爲第一離欲阿羅漢者，以我不存得果之念故也。若我稍存得果之念，謂我可以得阿羅漢道，則此心便有所著。世尊不應稱我爲樂阿蘭那行者矣。以我樂阿蘭那行，而實無所行，故佛深契之，而以樂阿蘭那行名之也。則凡欲得果者，可不去其所得之心哉。

莊嚴淨土分第十 ※成就莊嚴淨明心地

佛告須菩提。於意云何。如來昔在然燈佛所。於法有所得不。不也。世尊。如來在然燈佛所。於法實無所得。須菩提。於意云何。菩薩莊嚴佛土不。不也。世尊。何以故。莊嚴佛土者。即非莊嚴。是名莊嚴。是故須菩提。諸菩薩摩訶薩。應如是生清淨心。不應住色生心。不應住聲香味觸法生心。應無所住而生其心。須菩提。譬如有人。身如須彌山王。於意云何。是身為大不。須菩提言甚大。世尊。何以故。佛說非身。是名大身。

【註】如來，佛自稱也。然燈佛，釋迦牟尼授記之師。一大世界必有一佛設化，故曰佛土。莊嚴，如寫經造寺供養布施之類。是故須菩提。諸菩薩。皆概稱也。應無所住而生其心者，謂心當住於無所住處也。須彌山高廣三百三十六萬里爲眾山之王。非身，法身也，乃如如不動之真心。

【講】前須菩提自言所證之果，既不存得心矣，佛終恐其所得之

心未盡，故又從而點化之曰，須菩提，於意云何。爾謂我昔日在然燈佛所受記，於法有所得否，須菩提曰，不也。世尊。如來一心清淨，雖在然燈佛所受記，於法實無所得也。佛曰，一大世界，必有一佛設化，故謂之佛土。不知菩薩居是土，亦寫經造寺供養布施使佛土莊嚴否。須菩提曰，不也。世尊。莊嚴不過外相，於自性無涉，菩薩必不爲此也，何以故。蓋佛土即淨土也，淨土不事修飾，所謂莊嚴者，非真莊嚴也，不過虛名爲莊嚴而已。是故吾教之須菩提，諸菩薩，雖性量廣大，俱應如是生清淨之心。清淨云何，不應住於有形色者而生心，不應住於有聲音馨香滋味，及觸與法而生心，惟應屏絕六塵，於無所住處而生其心也。佛又曰，須菩提，譬如有人，身似須彌山王，爾之意以爲大否，須菩提曰，甚大。世尊。但此身雖大，究不足爲大，何以故，凡有形相者，皆屬有盡色身，縱如須彌山王，畢竟還有生滅，必如佛所說之非身，方可名爲大身耳。夫非身者，法身也，即真心也，

可以包太虛，藏世界，豈僅如須彌山王而已哉。

### 無為福勝分第十一

※修無為福勝於布施

須菩提。如恒河中所有沙數。如是沙等恒河。於意云何。是諸恒河沙。寧為多不。須菩提言甚多。世尊。但諸恒河。尚多無數。何況其沙。須菩提。我今實言告汝。若有善男子。善女人。以七寶滿爾所恒河沙數。三千大千世界。以用布施。得福多不。須菩提言甚多。世尊。佛告須菩提。若善男子。善女人。於此經中。乃至受持四句偈等。為他人說。而此福德。勝前福德。

【註】恒河周四十里。在西土。人所共見。故佛取以為喻。等，同也。

【講】前第八分，言三千大千世界七寶，以用布施，不如持經。佛又推廣其義而言曰，須菩提。恒河周四十里，可謂大矣，其中所有沙數，難以悉計。若一沙各為一河，俱等於恒河之大，爾之意，以為此諸恒河之沙，寧為多否。須菩提曰，甚多。世尊。一

沙即爲一河，一河各有其沙，河尚無數，何況其沙乎。佛曰，須菩提。我今實言告汝，若有善男子善女人，將七寶滿爾所說恒河沙數，三千大千世界，以用布施，是人得福，可云多否。須菩提曰。甚多。世尊。佛曰，布施得福雖多，究竟不若持經。若善男子善女人，於此經中，乃至四句偈等，非特受持，自見其性，且爲他人解說，使之亦見其性，則彼此共證無上妙道。此種福德，視彼七寶布施福德，豈不相懸萬萬乎。

## 尊重正教分第十二

※受持正教天人尊重

復次須菩提。隨說是經。乃至四句偈等。當知此處。一切世間天人阿修羅。皆應供養。如佛塔廟。何況有人盡能受持讀誦。須菩提。當知是人。成就最上第一希有之法。若是經典所在之處。即為有佛。若尊重弟子。

【註】隨說，隨順眾生而爲說法，心無分別也。此處，即此心也。世間，世上之人。天人，天上之人。阿修羅；阿，無也。羅，



眾也，即不修之眾生，魔王等類是也。殯佛之身為塔，供佛之像為廟。尊重弟子，弟子中之可尊可重者，若諸菩薩是也。

【講】上言持說福德，勝於布施，則經不可不說。故佛又呼須菩提曰，經功甚大，不可思議，如有善信之人，隨順眾生高下，逢凡說凡，逢聖說聖，為之講解是經，乃至四句偈等，多方演說，當知說經一偈之處，一切世間天人阿修羅，皆當以香花瓔珞，幢旛寶蓋，香油酥燈，恭敬供養是人，如藏佛身之塔，與供佛像之廟一般。何況有人，盡能受持，讀誦一經全文者乎。須菩提，當知是人，所成就者，為世間第一希有之法，若是經所在之處，便是佛在之處。人皆清淨奉持，即與佛無異，與可尊可重之弟子，諸大菩薩無異矣。

### 如法受持分第十三

※當如此法承受行持

爾時須菩提白佛言：世尊。當何名此經。我等云何奉持。佛告須菩提。是經名為金剛般若波羅密。以是名字。汝當奉持。所以者

何。須菩提。佛說般若波羅密。即非般若波羅密。是名般若波羅密。須菩提。於意云何。如來有所說法不。須菩提。白佛言：世尊。如來無所說。須菩提。於意云何。三千大千世界。所有微塵。是為多不。須菩提言：甚多。世尊。須菩提。諸微塵。如來說非微塵。是名微塵。如來說世界。非世界。是名世界。須菩提。於意云何。可以三十二相見如來不。不也。世尊。不可以三十二相得見如來。何以故。如來說三十二相。即是非相。是名三十二相。須菩提。若有善男子。善女人。以恒河沙等身命布施。若復有人。於此經中。乃至受持四句偈等。為他人說。其福甚多。

〔註〕微塵，塵中之微者，譬眾生妄念之多也。佛分身成化，於諸世界之中，示現無邊大神力，使一切眾生，在塵離塵，在世出世，故云非微塵。非世界。三十二相，莊嚴端好，指全身而言，俗本謂頭如何，腳如何，未免太拘，蓋佛不一，佛相不一相故也。末言布施不如持經，重言以結上文之意。

【講】須菩提白佛言。世尊。持說是經，成就希有之法，既聞命矣。不識此經當以何命名，我等云何受持乎，願明以教我，佛曰，須菩提，是經當名為金剛般若波羅密。蓋明是經者，其智慧如金剛之堅利，斷絕外妄，直達諸佛菩薩之彼岸也。以是名字，汝其尊奉而持守之。然真性本空，無可執著，智慧達彼岸之說，吾性中亦豈有是哉，何以故。須菩提，佛所說般若波羅密實非般若波羅密，不過虛名為般若波羅密，以引誘眾生耳。真性本來清淨，如此則知一切諸法，總屬外相，更有何法可說乎。吾試問爾，如來有所說法否。須菩提曰，如來萬法皆空，有何可說，即不得已而有說，亦與無說等也。佛曰。須菩提，於意云何。三千大千世界，所有微塵，是為多否。須菩提曰。甚多。世尊。佛曰，須菩提，我今明言告汝，微塵雖多，而無定體。世界雖大，數盡則壞，皆為虛妄。如來所說微塵，非真實微塵，是虛名為微塵。如來所說世界，非真實世界，是虛名為世界。惟真性至真至實，自

古及今，無變無壞也。夫眞性即法相，非身相也。佛恐須菩提不解，故又曰，須菩提，於意云何。可以三十二相見如來否，須菩提曰，不也，世尊，不可以三十二相見如來。佛曰，三十二相，乃現具之色身，而不可以此見如來者，此何故哉。蓋如來雖現色身，涅槃則盡，不能久存，如來說三十二相，非眞實相，是虛名爲三十二相。由斯以觀，色身既屬空虛，則著相布施，獲福寧有幾何，益信持說之福勝矣。須菩提，若有善男子，善女人，捨身命布施，並恒河沙布施，俱屬著相因果，何益於事。若復有人，於此經中，乃至受持四句偈等，爲他人說，自利利他，其福甚多。可見人法兩空，吾前言所謂不著相布施，於此益信矣。

#### 離相寂滅分第十四

※離諸形相自得寂滅

爾時須菩提△聞說是經△深解義趣△涕淚悲泣△而白佛言△希有世尊。佛說如是甚深經典。我從昔來所得慧眼。未曾得聞如是之經。世尊。若復有人。得聞是經。信心清淨。即生實相。當知是

人。成就第一希有功德。世尊。是實相者。即是非相。是故如來說名實相。世尊。我今得聞如是經典。信解受持。不足為難。若當來世。後五百歲。其有衆生。得聞是經。信解受持。是人即為第一希有。何以故。此人無我相。無人相。無衆生相。無壽者相。所以者何。我相。即是非相。人相。衆生相。壽者相。即是非相。何以故。離一切諸相。即名諸佛。佛告須菩提。如是如是。若復有人。得聞是經。不驚。不怖。不畏。當知是人。甚為希有。何以故。須菩提。如來說第一波羅密。即非第一波羅密。是名第一波羅密。須菩提。忍辱波羅密。如來說非忍辱波羅密。是名忍辱波羅密。何以故。須菩提。如我昔為歌利王割截身體。我於爾時。無我相。無人相。無衆生相。無壽者相。何以故。我於往昔節節支解時。若有我相。人相。衆生相。壽者相。應生瞋恨。須菩提。又念過去於五百世。作忍辱仙人。於爾所世。無我相。無人相。無衆生相。無壽者相。是故須菩提。菩薩應離一切相。

發阿耨多羅三藐三菩提心。不應住色生心。不應住聲香味觸法生心。應生無所住心。若心有住。即為非住。是故佛說菩薩心。不應住色布施。須菩提。菩薩為利益一切衆生。故應如是布施。如來說一切諸相。即是非相。又說一切衆生。即非衆生。須菩提。如來是真語者。實語者。如語者。不誑語者。不異語者。須菩提。如來所得法。此法無實無虛。須菩提。若菩薩心住於法。而行布施。如人入暗。即無所見。若菩薩心不住法。而行布施。如人有目。日光明照。見種種色。須菩提。當來之世。若有善男子。善女人。能於此經。受持讀誦。即為如來。以佛智慧。悉知是人。悉見是人。皆得成就。無量無邊功德。※種種音腫腫。

〔註〕實相，法身也。前屢言福德，此獨言功德者，蓋功成果滿，福不足道也。波羅密，有十種：一布施，二持戒，三忍辱，四精進，五禪定，六智慧，七慈，八悲，九方便，十不退。今云，第一波羅密者，指布施而言也。非第一波羅密者，拂去假名。不

住於相也。下言非忍辱波羅密，亦是此意。梵語歌利王，華言無道極惡君也。歌者，慧也。利者，刀也。王者，心也。是用慧刀，斷除無明煩惱之心也。割截支解等句，俱係喻意，不可認作實有其事。應生無所住心者，謂凡有住著處，不得起心也。此第十分之意，而推廣言之。

【講】上言受持之法。爾時，須菩提，深解無相義趣，涕淚悲泣，傷值遇之晚。白佛曰希有世尊，佛說如是甚深經典，我從昔來修行，雖具慧眼，聞法甚多，未曾有如是之妙者。世尊，若復有人，得聞是經，生篤信心，湛然清淨，則色身中有法身，即生如來實相，此人成就功德，誠爲第一希有。世尊，是實相者譬若太虛，所謂有相，即是非相，是故如來所說實相，總屬鏡花水月，豈真有實相之可名哉。世尊，我今聞是經典，信而不惑，解而無疑，受而不辭，持而不厭，不足爲難。若當來世，五百歲後，其有眾生，聞是經者，亦能信解受持，此人即爲第一希有。何也。

此人依是經修行，屏除妄念，不著諸相，無我相，無人相，無眾生相，無壽者相，所以者何。我相，即是非相。人相，眾生相，壽者相，即是非相。何以故。蓋了悟四相皆空，方能離一切諸相，成無上菩提，名爲諸佛不難矣。佛曰，須菩提，信如爾之言也。蓋大乘之法，非具大乘根器者，聞之未免驚焉而恐懼不寧，怖焉而憂疑不定，畏焉而退縮不前。若不驚，不怖，不畏，諦聽受持，永無退轉，此人甚爲希有，何以故。如來到彼岸之法，第一曰布施，次則曰忍辱，如來有布施之名，而不著布施之相，是知如來所說第一波羅密，即非第一波羅密，不過假名爲第一波羅密而已。如來有忍辱之名，而不著忍辱之相，是知如來所說忍辱波羅密，即非忍辱波羅密，不過假名爲忍辱波羅密而已。由斯以觀，人苟不驚，不怖，不畏，則布施忍辱二相皆空，諸相從此俱空，謂爲希有，寧爲過與。即如我昔日，曾爲歌利王，割截身體，若非得無相妙義，則被伊節節支解時，應生瞋恨心，乃我則毫無



瞋恨，以忍辱力，身復如故，非惟無苦，且復樂也。然忍辱豈僅一世哉。又念過去五百世後，作忍辱仙人，於爾所世，雖遇外侮，亦無我相，人相，眾生相，壽者相，此豈獨我然哉。須菩提，凡屬吾教之諸菩薩，俱應離一切相，發無上正等正覺心，不應住於色而生心，不應住於聲香味觸法而生心，應生無所住之心。若心有住，則住非所當住，即爲非住，而非菩薩之心矣。所以古之如來嘗有言曰，菩薩之心，莫不欲布施，但眾生之本，眼根清淨爲先，不應住於色而爲之布施也。須菩提，菩薩布施，原爲利益一切眾生，若心住於色，便是眼有財物，則布施有時而窮，故應如是無住相布施，方獲眞利益，然心無住矣。若稍存施受之念，終爲著相，故如來常說一切諸相，畢竟虛妄，而非眞實，即是非相。又說一切眾生，能悟眞空，離眾生相，即非眾生。須菩提，如來此語，是眞語，而非假也。是實語，而非虛也。是如語，而當理也。是非誑語，而欺人也。是非異語，而駭聽也。夫一切諸

相，既非真性所有，則一切諸法，又豈真性所有哉。須菩提，如來所得法，爲眾生而說，原非真實，然又不可不藉此以悟真性，又非虛假，有而不有，無而不無，真空之妙如此。須菩提，若菩薩之心住於法，而行布施，則教化眾生，無由開悟，如人入暗室，昏昏冥冥，一無所見。若菩薩之心不住於法，而行布施，則教化眾生，皆得開悟，如人有目，又得日光明照，種種諸色，無不畢見。夫真空無相，莫如此經。須菩提，當來之世，若有善男子，善女人，能於此經受持讀誦，非但爲口舌之功，抑亦究心學之妙，即爲如來所眷顧，用無上智慧，知見是人而照鑒之。不但利於一身，且將普於群生，不但利於一時，且將及於千萬億劫，而無量無邊功德，皆得成就矣。

### 持經功德分第十五 ※受持此經功德無量

須菩提。若有善男子。善女人。初曰分。以恒河沙等身布施。中日分。復以恒河沙等身布施。後曰分亦以恒河沙等身布施。如是

無量。百千萬億劫。以身布施。若復有人。聞此經典。信心不逆。其福勝彼。何況書寫。受持讀誦。為人解說。須菩提。以要言之。是經有不可思議。不可稱量。無邊功德。如來為發大乘者說。為發最上乘者說。若有人能受持讀誦。廣為人說。如來悉知是人。悉見是人。皆得成就。不可量。不可稱。無有邊。不可思議功德。如是人等。即為荷擔如來。阿耨多羅三藐三菩提。何以故。須菩提。若樂小法者。著我見。人見。衆生見。壽者見。即於此經不能聽受讀誦。為人解說。須菩提。在在處處。若有此經。一切世間天人阿修羅。所應供養。當知此處。即為是塔。皆應恭敬。作禮圍繞。以諸華香。而散其處。※稱量音秤良華音花

〔註〕信心不逆者，生篤信心，不相違背也。乘，車也。阿羅漢獨了生死，不度衆生謂之小乘。緣覺之人，半爲人，半爲己，謂之中乘。菩薩普度一切，謂之大乘。發，猶啓也。最上乘者，兼菩薩而載度之佛乘也。荷擔，仔肩之意。樂，好也。小法，外道

也。諸華香，即法華經所載。茉莉，青蓮，白蓮，等香是也。

【講】佛恐世人執忍辱之說，徒以身布施，墮入貪癡障中，故呼須菩提曰，若有善男子，善女人，初日分，寅卯辰時，以恒河沙等身命布施。中日分，巳午未時，復以恒河沙等身命布施。後日分，申酉戌時，亦以恒河沙等身命布施。如是一日三分，歷無量百千萬億劫，以身行布施，世間所斷無之事，即有之，亦不過得世間福耳。若復有人，聞是經典，信之於心，順而不逆，其所得之福，尚勝於彼，何況更能書寫，受持讀誦，爲人解說者乎。須菩提，要而言之，此經不可以心思，不可以口議，不可以器物稱量，功德廣大，無有邊際，然非遇發大乘心，發最上乘心者，如來斷不與之說也。若果有人，受持讀誦，逢凡說凡，逢聖說聖，廣爲闡發，使後學，各見性中無相之理，則是人心即是佛，佛即是心，如來佛智佛慧，悉知之，悉見之，皆得成就，不可量，不可稱，無有邊，不可思議功德。如來無上菩提，不難以一身荷擔

之矣，豈樂小法者，所可同日語哉。蓋樂小法之人，迷於外道，恒著我見，人見，眾生見，壽者見，即於此經，不能聽受讀誦，爲人解說，不知此經，普度一切，至微至妙。須菩提，在在處處，有此經典，便如摩尼寶珠，瑞光燦爛，一切世間，凡在天道人道，阿修羅道者，莫不至心供養。當知此處與藏佛真身，舍利寶塔一般，皆應恭敬作禮圍繞，以諸華香而散其處。所謂一人辦心，諸天辦供者，此類是也。

### 能淨業障分第十六

※若能清淨業障盡消

復次須菩提。若善男子。善女人。受持讀誦此經。若為人輕賤。是人先世罪業應墮惡道。以今世人輕賤故。先世罪業。即為消滅。當得阿耨多羅三藐三菩提。須菩提。我念過去無量阿僧祇劫。於然燈佛前。得值八百四十萬億那由他諸佛。悉皆供養承事。無空過者。若復有人。於後末世。能受持讀誦此經。所得功德。於我所供養諸佛功德。百分不及一。千萬億分。乃至算數譬喻所不

能及。須菩提。若善男子。善女人。於後末世。有受持讀誦此經。所得功德。我若具說者。或有人聞。心即狂亂。狐疑不信。須菩提。當知是經義。不可思議。果報亦不可思議。

【註】輕賤，謂疾病貧窮諸衰相，爲人所憎惡也。惡道，地獄，餓鬼，畜生也。梵語阿僧祇，華言無央數。梵語那由他，華言一萬萬。具說，詳言也。

【講】持誦此經，宜爲天人恭敬供養，而往往不免人之輕賤，鮮不以持誦爲無益矣。故佛曰，須菩提，若善男子，善女人，受持讀誦此經，反爲人所輕賤，是人前生罪孽深重，當墮地獄，餓鬼，畜生，三惡道中。以今生持誦之功，故祇爲人輕賤而已，前生罪業，即於消滅，來世無上正等正覺佛果，當得成就。須菩提，即如我往日，曾歷無量無央數劫，於然燈佛前，得遇八百四千萬億那由他諸佛，悉皆供養承事，無空過者。然祇求福而已，不能出離苦海。若復有人，於後末世，能受持讀誦此經，自悟本性，

永脫輪迴，其所得功德，以我所供養諸佛功德較之，百分不能及其一分，極而千萬億分，乃至算數之多，譬如微塵恒沙，皆不能及。蓋供養爲財施，受財施之報者，日漸少而終至於有盡。持誦爲法施，受法施之報者，日益增而終至於成佛。然則此經。豈人所易聞者乎。須菩提。若善男子。善女人。於後末世。有受持讀誦此經者。其所得功德。我若詳言其妙。下根之人聞之。甚者心即狂亂。次者狐疑不信。皆以我言爲夸而驚怪矣。須菩提。當知此經之義趣。與功德之果報。皆不可以心思而口議。我又何庸具說爲哉。

### 究竟無我分第十七

※成佛究竟本無我相

爾時須菩提白佛言世尊。善男子。善女人。發阿耨多羅三藐三菩提心。云何應住。云何降伏其心。佛告須菩提。善男子。善女人發阿耨多羅三藐三菩提心者。當生如是心。我應滅度一切衆生。滅度一切衆生已。而無有一衆生。實滅度者。何以故。須菩提。

若菩薩有我相人相衆生相壽者相即非菩薩。所以者何。須菩提。實無有法。發阿耨多羅三藐三菩提心者。須菩提。於意云何。如來於然燈佛所。有法得阿耨多羅三藐三菩提不。不也。世尊。如我解佛所說義。佛於然燈佛所。無有法得阿耨多羅三藐三菩提。佛言△如是如是。須菩提。實無有法。如來得阿耨多羅三藐三菩提。須菩提。若有法。如來得阿耨多羅三藐三菩提者。然燈佛即不與我授記。汝於來世。當得作佛。號釋迦牟尼。以實無有法得阿耨多羅三藐三菩提。是故然燈佛與我授記。作是言。汝於來世。當得作佛。號釋迦牟尼。何以故。如來者。即諸法如義。若有人言。如來得阿耨多羅三藐三菩提。須菩提。實無有法佛得阿耨多羅三藐三菩提。須菩提。如來所得阿耨多羅三藐三菩提。於是中無實無虛。是故如來說一切法。皆是佛法。須菩提。所言一切法者即非一切法。是故名一切法。須菩提。譬如人身長大。須菩提言：世尊。如來說人身長大。即為非大身。是名大身。須菩提



。菩薩亦如是。若作是言。我當滅度無量衆生。即不名菩薩。何以故。須菩提。實無有法。名為菩薩。是故佛說一切法。無我無人無衆生無壽者。須菩提。若菩薩作是言。我當莊嚴佛土。是不名菩薩。何以故。如來說莊嚴佛土者。即非莊嚴。是名莊嚴。須菩提。若菩薩通達無我法者。如來說名真是菩薩。※迦音加

【註】梵語釋迦，華言能仁。梵語牟尼，華言寂默也。由爾時以下，至實無有法發阿耨多羅三藐三菩提句，雖與第三分相似，但第三分言滅度一切，在生如是心。此言生如是心，亦非真實，語同而意有淺深。由於然燈佛所以下，至無實無虛句，雖與第七分第十四分相似。但第七分言無有定法，尚有法在。此言實無有法，則併法俱空矣。第十四分不著四相，專指布施忍辱而言，此則兼一切而言也，較前更覺精深闊大。由是故如來說一切法句以下至末。雖與第十分相似，但第十分非莊嚴非大身等語，虛論其理。此言通達無我法，便可直登彼岸，兼論其效，更得引誘後學之

意。

【講】此經既不可以心思而口議。則授持讀誦不容已矣。爾時須菩提，白佛言，世尊，善男子，善女人，發無上正等正覺心者，此心當住於何處，方能降伏其妄念乎。佛告須菩提，善男子，善女人，發無上正等正覺心者，當生如是超證一切眾生心。舉一切眾生，皆消滅其妄想而度化之。滅度一切眾生盡已成佛，而無有一眾生實滅度者。良由眾生自滅自度，我無功也，所以然者何也。蓋存滅度之念，即爲著相，若菩薩之心，一著於相，即有我人眾生壽者之見，而即非菩薩矣。夫無相可著，則無法可名，不但塵緣外感，盡屬空虛。即所謂發無上正等正覺心者，亦吾性中自具，豈是循途守轍依於法而後然哉。吾試問爾，我昔日在然燈佛所，多蒙授記，得無上菩提，爾謂有一定之法否。須菩提曰，不也，世尊，如我解佛所說義，空諸一切，則知於然燈佛所，無有法得無上菩提也。佛深以其言爲然，曰，如是如是。須菩提。實

無有法如來得無上菩提，若如來得無上菩提，果有一定之法，然燈佛即不與我授記，當即傳以成佛之法矣，何待沾沾然向我言曰，汝於來世，當得作佛，號釋迦牟尼乎。惟實無有法得無上菩提，故然燈佛與我授記作是言，謂汝於來世，當得作佛，號釋迦牟尼云云也。夫記乃如來得果之妙諦，而如來者，即真性也。真性貫徹三世，綿亘十方，即諸法皆自得如之義，豈有定法之可名哉。若有人言，如來得無上菩提，必有定法，此皆妄語而不足信也。庸詎知如來得無上菩提，皆由積功累行之久，具心領神會之妙，萬緣淨而諸相空，實無有法可得。然無法可得，而又不可謂非得，得而無得之中，實而不實，虛而不虛。所以如來常說一切諸法，皆是用之以修行而成佛之法也，夫用以修行，即虛而不虛也，而成佛初不在是，即實而不實也，此豈可泥乎。須菩提，如來所言一切法，非真實一切法，不過假此修行，虛名爲一切法耳，此義可借喻而知之矣。須菩提，譬如人身長大，果真實否。須菩

提曰，世尊，如來說人身長大，然有生滅，有限量，非真實大身，不過虛名爲大身而已。佛曰，須菩提，菩薩教化眾生，非爲真實，亦如大身之不真實。若菩薩作是言，謂無量眾生，皆由我而滅度之，如此見識，是成佛有法矣，尙得名之爲菩薩乎，何以故。蓋眞性空空洞洞，非惟無法，併菩薩之名，亦屬虛假，實無法名爲菩薩。是故佛說一切諸法，無我人眾生壽者，既無四者，又安得有所謂菩薩乎。至於離相以度眾生，使一切世界皆爲清淨，正是眞莊嚴處。若菩薩不於此是求，反曰，我當以金珠等寶莊嚴世間佛土，值凡夫之見耳，不得名爲菩薩，何以故。如來說莊嚴佛土者，不過外飾之莊嚴，非眞莊嚴，但強名爲莊嚴而已。夫起度化心，著莊嚴相，不得名爲菩薩。畢竟發何等心，方得名爲菩薩乎。必也四通八達，深明無我之法，遠離一切諸相，人法兩忘，則度化之心，與莊嚴之心，俱不起矣，故如來說名眞是菩薩。

一體同觀分第十八 ※萬法歸一更無異觀

須菩提。於意云何。如來有肉眼不。如是。世尊。如來有肉眼。  
須菩提。於意云何。如來有天眼不。如是。世尊。如來有天眼。  
須菩提。於意云何。如來有慧眼不。如是。世尊。如來有慧眼。  
須菩提。於意云何。如來有法眼不。如是。世尊。如來有法眼。  
須菩提。於意云何。如來有佛眼不。如是。世尊。如來有佛眼。  
須菩提。於意云何。如恒河中所有沙。佛說是沙不。如是。世尊。  
如來說是沙。須菩提。於意云何。如一恒河中所有沙。有如是  
沙等恒河。是諸恒河所有沙數。佛世界如是。寧為多不。甚多。  
世尊。佛告須菩提：爾所國土中。所有衆生。若干種心。如來悉  
知。何以故。如來說諸心。皆為非心。是名為心。所以者何。須  
菩提。過去心不可得。現在心不可得。未來心不可得。

【註】見眾生形色，名曰肉眼。見大千世界，名曰天眼。見自性  
般若，名曰慧眼。見一切法無一切法，名曰法眼。無自性可守，

無諸佛可求，放大光明，破諸黑暗，名曰佛眼。如是世尊，既然而復稱之也。若，如也。干，數也。謂眾生之心，種種有差別也。非心，妄想之心也。是名爲心，不起妄想，即是本心也。過去現在未來，謂之三世。不可得，猶言不可有也。

【講】上言通達無我法而後可名爲菩薩。然真空之中，自有實見。故佛曰，須菩提，於意云何，如來有觀見眾生之肉眼否。須菩提曰，如是，世尊，如來有肉眼。佛曰，須菩提，於意云何，如來有普照世界之天眼否。須菩提曰，如是，世尊，如來有天眼。佛曰，須菩提，於意云何，如來有返觀內照之慧眼否。須菩提曰，如是，世尊，如來有慧眼。佛曰，須菩提，於意云何，如來有見諸法皆空之法眼否。須菩提曰，如是，世尊，如來有法眼。佛曰，須菩提，於意云何，如來有真性常昭，上自諸天，下至九幽，毫無障礙之佛眼否。須菩提曰，如是世尊，如來有佛眼。佛既具此五眼，則所知極廣，豈有不能覺一切眾生之心乎。故佛又曰

，須菩提，於意云何，如恒河中所有之沙，佛說是沙否。須菩提曰，如是，世尊，如來說是沙。佛曰，須菩提，於意云何，如一恒河中所有之沙，分之各爲一恒河，而諸恒河中所有之沙，分之各爲佛世界，佛世界如是，寧爲多否。須菩提曰，甚多，世尊。佛曰，須菩提，彼佛世界雖多，所有一切眾生，若干種心，總名妄心，如來悉能知之。誠以性體光明，無不遍照也。無不遍照者，常住之真心，歷萬劫而不變者也，何以故。如來說一切諸心，總屬虛假，皆爲非心，若識諸心非心，是名爲心，又安有過去現在未來之妄想哉，所以者何。須菩提，凡思念前事，爲過去心。思念今事，爲現在心。思念後事，爲未來心。此三種心，本來無有，乃因事而生，今真心常住，則萬法皆空，三種心於何而有哉。

### 法界通化分第十九

※法身遍界通化無邊

須菩提。於意云何。若有人滿三千大千世界七寶。以用布施。是

人以是因緣。得福多不。如是。世尊。此人以是因緣。得福甚多、須菩提。若福德有實。如來不說得福德多。以福德無故。如來說得福德多。

〔註〕因緣，即因由也。福德有實者，以福德爲有，而妄生希冀也。福德無故者，以福德爲無，而不著一切相也。此與第八分相似，但第八分言七寶布施不如持經，是望人藉經行布施，此言七寶布施福德有限，是望人離相行布施，較第八分更覺空闊。

〔講〕心有所著，即爲非心，可見福德不宜執著，而生希望矣。故佛曰，須菩提於意云何，若有人滿三千大千世界七寶以用布施，是人以是布施因緣，得福多否。須菩提曰，如是世尊，是人以是因緣得福甚多。佛曰，修因得果，報應之常，七寶布施，得福甚多，理固然也。但下乘之人，以福德爲有，藉布施以求遂其私，此爲妄心。福德雖多，終屬小果，未免有盡，故如來不說得福德多。惟大慧之人，以福德爲無，藉布施以修己之性，此爲佛心。



，所得福德，譬如虛空，無有邊界，故如來說得福德多也。豈彼住相布施，所可同日而語哉。

### 離色離相分第二十 ※色相皆妄離妄見性

須菩提。於意云何。佛可以具足色身見不。不也。世尊。如來不應以具足色身見。何以故。如來說具足色身。即非具足色身。是名具足色身。須菩提。於意云何。如來可以具足諸相見不。不也。世尊。如來不應以具足諸相見。何以故。如來說諸相具足。即非具足。是名諸相具足。

【註】具足，毫無虧欠也。色身，三十二相也。具足諸相，變化神通不止三十二相而已也。此與第五分第十三分相似，但第五分言，凡所有相皆是虛妄，是欲人於有相之如來，見無相之如來。此言具足色身，又云具足諸相，是欲人於神妙不測之如來，見真性一定之如來。第十三分言與其見如來三十二相之假，不如持經之真，是引人持經，此言不但三十二相是假，即變化神通，亦非

真也。是極贊如來，語同而意自別。

【講】前言諸佛所證，乃無爲福德，又何身相之可見乎。故佛曰，須菩提，於意云何，可以三十二相具足之色身見佛否。須菩提曰，不也，世尊，一切色身，皆爲虛假，不應以此見佛也，何以故。如來說具足色身，即非具足色身，惟真性無變無壞，方可名爲具足色身。佛曰，須菩提，於意云何，具足色身，既不可以見如來，可以變現神通具足之諸相見如來否。須菩提曰，不也，世尊，色身諸屬虛假，諸相亦非真實，亦不應以此見如來也，何以故。如來說諸相具足，即非具足，惟真性靜涵萬有，方可名爲諸相具足。總之身相，華也。真性，實也。欲見如來，奈何不求之於其實，而徒求之於其華哉。

## 非說所說分第二十一

※法無可說所說非法

須菩提。汝勿謂如來作是念。我當有所說法。莫作是念。何以故。若人言。如來有所說法。即為謗佛。不能解我所說故。須菩提

。說法者。無法可說。是名說法。爾時慧命須菩提。白佛言：世尊。頗有衆生。於未來世。聞說是法。生信心不。佛言：須菩提。彼非衆生。非不衆生。何以故。須菩提。衆生衆生者。如來說非衆生。是名衆生。

【註】莫作是念者，教須菩提不可存此念也。慧以德言，命以壽言，即長老之稱。此分前半與第七分如來無所說之義相似。後半與第十四分一切衆生即非衆生之義相似。但第七分乃須菩提自作答語，此則就須菩提所以明者而復進之也。第十四分言之略，此則言之詳也。

【講】色身諸相既不足以見如來，則爲人說法又豈足以見如來乎。故佛曰，須菩提，汝見如來日與衆生講解，遂謂如來有法可說耶，汝莫作是念也，何以故。蓋明真性者，則無法可說，若人言如來有所說法，是謂如來不明真性，即爲謗佛，良由不能解我所說法空之義故也。須菩提，所謂說法者，不過爲衆生斷除外妄，

不得已而有說耳。若眾生既悟，則此法應捨，實無可說，但虛名爲說法而已。爾時長老須菩提，心開意解。白佛言，世尊，頗有眾生，於未來世，聞說是法，生信心否。佛曰，須菩提，彼具真一之性，與佛同源，非眾生也，然現具眾生之相，又不可謂非眾生，何以故。眾生眾生者，如來說非真實眾生，但虛名爲眾生而已。若眾生能生信心，了悟真性，亦即是佛，又安有眾生之名哉。

## 無法可得分第二十二

※悟性空故無法可得

須菩提白佛言：世尊。佛得阿耨多羅三藐三菩提。為無所得耶。佛言：如是如是。須菩提。我於阿耨多羅三藐三菩提。乃至無有少法可得。是名阿耨多羅三藐三菩提。

【註】上言無法可說，即無法可得。此言真性清淨空虛，不但無法可得，並無上菩提之名，亦屬虛假，較第七分之義更深。

【講】須菩提聞佛無法可說之義，恍然有悟。白佛言，世尊，有

法可得，是名法縛。無法可得，方謂解脫。今佛得無上菩提，於法殆無所得耶。佛深以其言爲然，曰如是如是。須菩提，我於無上菩提，毫不著相，乃至無有少法可得，亦併無名可名，但虛名爲無上菩提而已。蓋萬法皆空，故得而無得也。

### 淨心行善分第二十三

※以清淨心行諸善法

復次須菩提。是法平等。無有高下。是名阿耨多羅三藐三菩提。以無我無人無衆生無壽者。修一切善法。即得阿耨多羅三藐三菩提。須菩提。所言善法者。如來說即非善法。是名善法。

〔註〕是法，指眞性而言。平等，佛與衆生無高下也。修一切善法，謂常行方便，隨順衆生而爲說法，令悟眞性也。

〔講〕如來無少法可得，則諸相皆空，尙安有人己之見哉。故呼須菩提曰，人皆以佛爲高，以衆生爲下，不知法皆平等，上自諸佛，下至螻蟻，皆含眞性，無所分別。蓋色身有高下，而眞性無高下，是以名爲無上菩提也。然所以名爲無上菩提者，以眞性中

本無我人眾生壽者故也。若能悟此四相皆空，而修一切善法，則得無上菩提不難矣。然一切善法，佛不過借此以開悟眾生耳，究竟本來無是也。須菩提，所言善法者，如來說即非善法，是虛名爲善法而已，善法者，真性也，真性豈可謂之法哉，真性我所本有，又豈可謂之得哉。

#### 福智無比分第二十四

※福智甚大無物可比

須菩提。若三千大千世界中。所有諸須彌山王。如是等七寶聚。有人持用布施。若人以此般若波羅密經。乃至四句偈等。受持讀誦。為他人說。於前福德。百分不及一。百千萬億分。乃至算數譬喻所不能及。

〔註〕此分之義，第八分言之，第十一分第十九分言之，至此又言之。但第八分言聚寶布施不如持說，重在持說。此言持說福德勝於布施，重在福德。第十一分以恒河沙譬，極言福德之多。此以須彌山王譬，極言福德之大。第十九分歸重福德無故，言福德

亦屬虛假，與此毫不相複。總之後十數分，與前十數分語同而意別者甚多，世人不察，謂如來爲續到者重言之，不知如來敷宣妙義，著而爲經。諸大弟子皆可按簡尋求，何必爲續到者覆說一遍乎。且此經爲阿難尊者所記，若有複語，自應刪去，豈有重疊敘入之理。

【講】前言修一切善法，即得無上菩提，則持說福德，寧有限乎。故呼須菩提曰，大世界中，所有須彌山王，若有人聚三千大千世界之七寶，如須彌山王之高，持以布施，其福德似不可量矣，然非性中之福德也。若人以此般若波羅密經，乃至四句偈等，受持讀誦，爲他人說，是修自性福德，聚自身七寶，不但自利，亦且利他，如此無量福德，以前七寶布施之福德較之，百分不能及其一分，極而至於百千萬億分，乃至算數之多，譬如微塵恒沙，皆不能及也。蓋世間福，有時而盡，出世間福，無時而窮，豈可相提而並論哉。

化無所化分第二十五 ※聖凡同性化無所化

須菩提。於意云何。汝等勿謂如來作是念。我當度眾生。須菩提。莫作是念。何以故。實無有眾生如來度者。若有眾生如來度者。如來即有我人眾生壽者。須菩提。如來說有我者。即非有我。而凡夫之人。以為有我。須菩提。凡夫者。如來說即非凡夫。是名凡夫。※凡夫音凡孚

【註】此與第三分第十七分相似。但第三分言滅度眾生，如來不居其功。第十七分言滅度眾生，如來實無有法。此言眾生本非凡夫，所以能自滅度。語句雖同，各有精義。

【講】持說有無量福德，則此經洵能滅度一切矣，然與如來無與也。故呼須菩提曰，於意云何，汝等勿謂如來作是念，我當以此經度眾生，汝莫作是念也，何以故。蓋眾生自滅自度，如來不過爲之指示出頭路耳，實無有眾生爲如來度者。若有眾生爲如來度者，如來即有我人眾生壽者四相矣。如來既無四相，因何有時而



稱我。須菩提，當知如來說有我者，乃對凡夫而言，所謂有我者，即非有我，而凡夫之人，以爲如來有我耳。然佛此性，凡夫亦此性，佛與凡夫，寧有異乎。須菩提，凡夫者，如來說即非凡夫，是名凡夫。蓋凡夫能悟自性，便是如來，不過虛名爲凡夫而已，豈有真實之凡夫哉。

## 法身非相分第二十六

※清淨法身非屬相貌

須菩提。於意云何。可以三十二相。觀如來不。須菩提言：如是如是。以三十二相觀如來。佛言：須菩提。若以三十二相觀如來者。轉輪聖王。即是如來。須菩提白佛言：世尊。如我解佛所說義、不應以三十二相觀如來。爾時世尊而說偈言。

若以色見我。以音聲求我。

是人行邪道。不能見如來。

【註】轉輪聖王，即四大天王，管四部洲，如車輪之轉。邪道，外道也。此與第五分第十三分相似。但前二分，乃須菩提已悟三

十二相不可以見如來之旨，自作註語。此則佛恐須菩提執相之見未除，故就其已悟者，而復申明之也。

【講】真性中既無佛與凡夫之別，則相之不可執也明矣。故佛呼須菩提曰，於意云何，可以三十二相觀如來否。須菩提疑佛與凡夫既無異性，則凡夫有身，佛亦有身，故答曰，如是如是，可以三十二相觀如來。佛曰，三十二相，外貌也，非真性也。若以此觀如來，則色身莊嚴者，莫如轉輪聖王，彼亦可謂之如來矣，如來恐不在此區區外貌間也。須菩提疑心頓釋，白佛言，世尊。如我解佛所說義，則知色身有盡，法身無窮，不應以三十二相觀如來，有斷然矣。佛於是迎其機而作偈曰，如來者，真性也，真性即我也。視之不見，以形色相見不可也。聽之不聞，以音聲相求不可也。若見我求我於形色音聲之間，是人徒觀外貌，而不識真性，則所行者邪道，豈能見常住之如來，聞無上之妙義哉。

## 無斷無滅分第二十七

※依法修持不應斷滅

須菩提。汝若作是念。如來不以具足相故。得阿耨多羅三藐三菩提。須菩提。莫作是念。如來不以具足相故。得阿耨多羅三藐三菩提。須菩提。汝若作是念。發阿耨多羅三藐三菩提心者。說諸法斷滅。莫作是念。何以故。發阿耨多羅三藐三菩提心者。於法不說斷滅相。（前段首句不以具足相故。不字係衍文。古本皆無此字。）

【註】說諸法斷滅者，謂一切法皆不用也。於法不說斷滅相者，謂未悟時必須依佛法修行也。此分凡二段，前段是賓，後段是主。

【講】如來常言無法可說，又恐人執著無字，流入空寂，故乎須菩提曰，汝若作是念，謂如來以具足相故，得無上菩提，是以有相視如來，汝莫作是念也。蓋如來之無上菩提，不以具足相，而得者也。然萬法雖空，而修行有徑，法又豈可斷滅乎。須菩提，汝若作是念，謂發無上菩提心者，說一切法皆當斷滅，是以空寂

視如來，汝莫作是念也，何以故。蓋發無上菩提心者，於一切法相，不說斷滅故也。譬如渡水，既渡之後，不須舟楫，未渡之先，豈可無舟楫乎。

### 不受不貪分第二十八 ※一塵不染何貪何受

須菩提。若菩薩以滿恒河沙等世界七寶。持用布施。若復有人。知一切法無我。得成於忍。此菩薩勝前菩薩所得功德。何以故。須菩提。以諸菩薩不受福德故。須菩提白佛言：世尊。云何菩薩不受福德。須菩提。菩薩所作福德。不應貪著。是故說不受福德。

【註】聚寶布施，福德有限，前屢言之，俱是虛論其理。此則示以下手功夫，使學者有所遵循，不致浮虛掠影。

【講】法固不可斷滅，若欲受福德，又未免貪著。故呼須菩提曰，若菩薩以滿恒河沙等世界之七寶，持以布施，福德終屬有盡。若復有人，知一切法本來無有我相，忍之於六塵未接之先，忍之

於六塵方接之際，忍之於六塵既寂之後，忍之又忍，至於成佛而後已。此菩薩所得功德，勝前七寶布施之菩薩所得功德，何以故。須菩提，以諸菩薩之心，活潑潑地，洞若太虛，不受世間一切福德故也。爾時須菩提得聞妙義，白佛言，世尊，菩薩濟渡眾生，原爲希求福德，今反云不受，何也。佛曰，須菩提，菩薩本不爲作福德而渡眾生，此心不應少有貪著，是故說不受福德。究之不受福德，而福德隨之，有不期然而然者已。

### 威儀寂淨分第二十九

※眞性寂靜不假威儀

須菩提。若有人言。如來若來若去。若坐若臥。是人不解我所說義。何以故。如來者。無所從來。亦無所去。故名如來。

【註】若來若去，猶云若住若行，無所來無所去。二句形容贊歎之詞。三如來，俱指眞性而言。

【講】菩薩之心，既不求福德，則諸相皆空，尙何威儀之外著乎。故佛曰，須菩提，來去坐臥，謂之四威儀。若有人言，如來若

來若去，若坐若臥，是以有相視如來，而於我所說無相之義，殊未解也，何以故。所謂如來者，即真性也。真性放之彌於六合，無所從來，斂之藏於一心，亦無所從去，去來皆得自如，方可名爲如來。既無來去，自無坐臥，蓋空空洞洞，而威儀寂淨也。

### 一合理相分第三十

※一合之理實無有相

須菩提。若善男子。善女人。以三千大千世界碎為微塵。於意云何。是微塵衆寧為多不。須菩提言：甚多。世尊。何以故。若是微塵衆實有者。佛即不說是微塵衆。所以者何。佛說微塵衆即非微塵衆。是名微塵衆。世尊。如來所說三千大千世界。即非世界。是名世界。何以故。若世界實有者。即是一合相。如來說一合相。即非一合相。是名一合相。須菩提。一合相者。即是不可說。但凡夫之人。貪著其事。

【註】微塵，妄念也。眾，猶多也。一合相，真性也。貪著，依戀也。事，即色身中六根也。

【講】凡夫妄念紛紜，不可勝計，故佛借喻曰，須菩提，若善男子，善女人，以三千大千世界碎爲微塵，爾之意以爲是微塵眾，寧爲多否。須菩提曰，甚多，世尊。何以故，若是微塵眾是實有者，佛即不說是微塵眾，所以不說者何故，蓋佛說微塵眾，即非微塵眾，是虛名爲微塵眾而已。知微塵眾非真實，則知世界矣，世尊。如來所說三千大千世界，亦非實有，不過末劫之人，強名爲世界耳。何以故，若世界是實有者，即與一合相無異矣。一合相者，真性也。真性彌綸六合，有而非有，無而非無，故一而不可二，合而不可分也。若世界則是假合，劫盡則壞，故不可與真性相比也。然所謂一合相，豈果有相乎。如來說一合相，即非一合相，亦虛名而已，豈真有一合相哉。佛曰，須菩提，一合相者，包涵萬有，是誠不可以言說也。所以不可說者，因凡庸之人，貪著性中所現之事，如目遇色則爲色引，耳聞聲則爲聲誘，六根不淨，了悟無期，即與之說，彼亦不解，故不如不說之爲愈也。

知見不生第三十一 ※如是知見法相不生

須菩提。若人言佛說我見人見衆生見壽者見。須菩提。於意云何。是人解我所說義不。不也。世尊。是人不解如來所說義。何以故。世尊說我見人見衆生見壽者見。即非我見人見衆生見壽者見。是名我見人見衆生見壽者見。須菩提。發阿耨多羅三藐三菩提心者。於一切法。應如是知。如是見。如是信解。不生法相。須菩提。所言法相者。如來說即非法相。是名法相。

【註】如來言不著四相之見屢矣。始則令諸學人除去粗重四相，如大乘正宗分中所說是也。次則令諸學人見性之後，復除細微四相，如究竟無我分中所說是也。此言理中清淨四相，由淺而深，循循善誘，所以開悟學人者至矣。

【講】凡夫貪著其事，以有我人眾生壽者之見也。故呼須菩提曰，諸相皆空者佛也。若有人言，佛尚說我見人見眾生見壽者見，此等妄議之人，汝之意以爲是人解我所說無相之義否。須菩提曰



，不也，世尊。妄議之人，墮於癡迷，不解如來所說義，何以故。蓋此四相之見，真性中本來無有。世尊說我見人見眾生見壽者見，即非我見人見眾生見壽者見，是虛名爲我見人見眾生見壽者見而已。須菩提，悟佛不著四者之見，則知見廣而信解深矣。故佛又曰，須菩提，四見既屬空虛，則發無上菩提心者，凡於一切法，皆應如是知，如是見，應如是信解，而後人已胥忘，畛域俱化，不生一切法相。須菩提，所謂法相者，如來說非真實，是虛名而已。蓋初入道時，不假法相，無門可入，既見性後，當離法相，不宜執著，所謂渡河當用筏，到岸不須船者也。

### 應化非真分第三十二

※應現設化亦非真實

須菩提。若有人。以滿無量阿僧祇世界七寶。持用布施。若有善男子善女人。發菩提心者。持於此經。乃至四句偈等。受持讀誦。為人演說。其福勝彼。云何為人演說。不取於相。如如不動。何以故。

一切有為法。如夢幻泡影。

如露亦如電。應作如是觀。

佛說是經已△長老須菩提△及諸比丘△比丘尼△優婆塞△優婆夷  
一切世間天人阿修羅△聞佛所說△皆大歡喜△信受奉行

〔註〕如如者，自如之極也。有為法，布施等類是也。夢幻泡影  
露電，皆不長久者也。全經大旨，無非欲人由法相而悟真空。持  
說之功，勝於聚寶布施，故於篇末重言以結之。男僧謂之比邱，  
女僧謂之比邱尼，居士謂之優婆塞，道姑謂之優婆夷。

〔講〕上言發無上菩提心者，在不生一切法相。然則無上菩提於  
何而得哉，則莫若持說此經。故終呼須菩提而告之曰，若有人以  
滿無量無央數世界之七寶，持以布施，其所得之福，可謂多矣。  
然所得乃世間之福，有時而盡，況因受福而又作惡乎。若有善男  
子善女人，發菩提心，於此經中，乃至四句偈等，受持讀誦，爲  
人演說，此出世間福，歷劫無窮，殊勝於彼也。云何爲人演說，

如欲爲天人演說，則現而爲天人。欲爲異類演說，則現而爲異類，隨感而應，不拘定相，自如之極，而實寂然不動，此所謂無爲法也，何以故。凡一切法，皆屬有爲，縱得世間福，不過如夢耳，幻耳，泡耳，影耳，露耳，電耳，應作如是等觀，而不得長久也。惟知萬法皆空，悟眞性爲實，則智慧生，而到彼岸不難矣。前所謂應如是住者，正住此如如不動之眞心也。如是降伏者，正降伏此有爲之妄心也。全經大義，不於此而益明哉。佛說是經已畢，長老須菩提，及一切大眾，聞此妙義，盡生歡喜，敬信承受而奉行不怠焉。蓋聖凡悉濟，而人天胥度云。

### 金剛咒

唵 呼嚧呼嚧 社曳穆契莎  
梭音訶

### 補闕真言

南無喝囉 拉音怛 達音那。  
儺音哆 多上聲囉夜耶。  
佉音佉 茄音囉佉囉。  
俱住俱住。  
摩囉摩囉 虎囉 吽 烘去聲賀賀蘇怛拏。  
吽 末音潑抹拏娑婆訶。

讚

金剛般若功德難宣。四句妙義廣無邊。須菩提。信力堅。無說無傳應作如是觀。南無祇園會上佛菩薩。三稱

金剛般若波羅密經 畢

觀音大士降筆法語

海南老衲。致語善信。吾曾有願。普度世人。因有心經。流傳甚久。口誦者既多茫昧。強解者流入野狐。將吾一片人天胥度之心。而爲果報小乘之義。深可憫惻。蒙 道祖呂師。逐字銓解。痛掃支離。歸於明顯。吾道心燈。賴以不滅。善哉善哉。世人若能信心奉持。身有光明。吉祥擁護。不墮輪迴。不落苦趣。萬千罪孽。一概消除。幸速付梓。普成善果。

# 心經

圓通文尼自在光佛直解  
永豐喻 梅早春校正

## 般若波羅密多心經

【註】般若，智慧也。波羅密，到彼岸也。多，定也。經，徑也。言此經乃定心之徑路也。

觀自在菩薩。行深般若波羅密多時。照見五蘊皆空。度一切苦厄。舍利子。色不異空。空不異色。色即是空。空即是色。受想行識。亦復如是。舍利子。是諸法空相。不生不滅。不垢不淨。不增不減。是故空中無色。無受想行識。無眼耳鼻舌身意。無色聲香味觸法。無眼界。乃至無意識界。無無明。亦無無明盡。乃至無老死。亦無老死盡。無苦集滅道。無智亦無得。以無所得故。菩提薩埵。依般若波羅密多。故心無罣礙。無罣礙故。無有恐怖。遠離顛倒夢想。究竟涅槃。三世諸佛。依般若波羅密多。故得阿耨多羅三藐三菩提。故知般若波羅密多。是大神咒。是大明咒。是無上咒。是無等等咒。能除一切苦。真實不虛。故說般若波羅密多咒。

即說咒曰。揭諦揭諦。波羅揭諦。波羅僧揭諦。菩提薩婆訶。

※行深，音幸深。行識，音形志。埵，音朵。罍，音卦。

【註】觀自在者，變化從心，達觀自得也。菩，覺也。薩，情也。義理先具，能覺一切有情之義。蘊，藏也。色受想行識，謂之五蘊，全經重此一句。度一切苦厄，兼自度度他而言。舍利子，人名。因色而有受，因受而有想，因想而有行，行之不得，則識於心而不忘，五者相因。諸法空相者，謂真性有而非有，無而非無，是諸法之空相也。真性累劫不毀，故不生不滅。真性本來無染，故不垢不淨。真性不著一物，故不增不減。眼耳鼻舌身意，謂之六根。色聲香味觸法，謂之六塵。一切諸法，皆緣意起，故法屬意。或謂法與發同，即發動也，亦通。目之所見爲眼界，心之所知爲意識界。無無明者，無昏昧之處也。無老死者，常存不壞也。苦，煩惱也。集，積也。猶云積萬過千愆於一身也。二者謂之苦果苦因。滅，涅槃也。道，路也，猶云修行得路也。二者

謂之樂果，樂因。梵語菩提薩埵，華言菩薩。涅槃，不生。槃，不死。阿，無也。耨多羅，上也。三，正也。藐，等也。三菩提，正覺也。揭諦揭諦，揭妙諦以度人也；重言之，自度度他也。僧，眾也。薩婆訶，疾速也；謂疾速成就一切眾生也。

【講】阿難說，吾教有觀自在菩薩者，功行最深，具大智慧，達到彼岸之時，照見自己之五蘊，與眾生之五蘊，皆屬空虛。於已則修無上菩提，於人則多方接引，俾一切苦惱之厄，盡歸解脫。弟子舍利子，正是欲離苦厄者。菩薩呼其名而告之曰，舍利子，爾知世間有形者爲色，無形者爲空，不知色乃夢幻泡影，不異夫空也。空乃一真顯露，不異夫色也。色不即是空，空不即是色乎。夫因色而有受，因受而有想，因想而有行，行之不得，則識於心而不忘，此五者，相因而見者也。今色既是空，則受想行識，亦復如是矣。由是真性常清常淨，毫無法相可名，不誠爲諸法中之空相乎。言乎其妙，則常存不敝，不生不滅也。湛然清虛，不

垢不淨也。自然恰好，不增不減也。是故真空之中，既無色受想行識，則六根俱淨，無眼耳鼻舌身意也。六塵不擾，無色聲香味觸法也。六根之累，以眼爲先，今眼界既空，則萬緣悉泯，而意識胥忘。將見由定而靜，由靜而慧，無無明，亦無無明盡也。由久而固，由固而貞，無老死，亦無老死盡也。煩惱之苦果，作業之苦因，涅槃之樂果，修持之樂因。一時俱盡，則真空中本無智慧可名，即到彼岸亦屬虛假，而又何所得哉。然無智無得，從乎既得菩提以後而言也。若未得之先，豈可無法哉。所以菩提薩埵，以般若波羅密多，爲修行之法。守其六根，絕其六塵，故心無牽罣滯礙，故無有恐怖之態。遠離夫神魂之顛倒，夢寐之妄想，至於不生不死而後已。不但菩薩爲然也，即三世諸佛，欲得無上菩提，亦無有不依般若波羅密多者。是知般若波羅密多，是變化不測之密語，是神光普照之密語，是至極無加之密語，是獨絕無倫之密語。阿難所云，能除一切苦，斯言誠真實而不虛。更有密



咒，汝時時誦之，可以生智慧，可以到彼岸矣。咒曰，揭諦揭諦，揭出妙諦以度人也；重言之，自度度他也。波羅揭諦，欲到彼岸，必須賴此妙諦也。僧，眾也。薩婆訶，疾速也；謂疾速成就一切眾生也。總之，密咒雖修行之徑路，而徑路不外於此心。人能空其五蘊，則主翁常定，而客感自清，豈有不得無上菩提者哉。

梅按：心經分六段讀則明顯。自觀自在菩薩，至度一切苦厄爲一段。舍利子至無智亦無得爲一段。以無所得至究竟涅槃爲一段。三世諸佛至故得阿耨多羅三藐三菩提爲一段。故知般若波羅密多至故說般若波羅密多咒爲一段。即說咒曰至菩提薩婆訶爲一段。經文本一氣呵成，分此六段者，猶流水面上見微波，而初讀易於領會也。末段「即」字下宜著一「又」字解之。本經重在一「多」字，不多不能成功也。

跋

金剛經大旨。總是欲人守六根。絕六塵。而六根六塵之不淨者。以五蘊未空也。觀自在菩薩。特為拈出。示後學以會歸之路。文僅二百六十八字。而言簡意賅。可包金剛經三十二分之全。讀金剛經而不讀心經。是涉博而不知反約也。烏乎可。純陽子敬跋。般若波羅密多心經 畢

# 呂祖師降三十二次偈

## 第一章

得手功夫切莫疑。  
行行直上山頭去。

疑心若起便途迷。  
柳媚花明遇自奇。

## 第二章

作善如登百尺竿。  
直須勤力行功過。

下來容易上來難。  
人獸幾希要細參。

## 第三章

迅速光陰不可留。  
不信試把青菱照。

年年只見水東流。  
昔日朱顏今白頭。

## 第四章

萬轉身如不繫舟。  
臨流執定篙和舵。

風翻浪湧便難收。  
一路輕帆到岸頭。

## 第五章

萬法皆空莫浪求。  
情枷愛鎖都拋卻。

如來只在此心頭。  
無束無拘得自由。

## 第六章

天堂快樂幾多般。  
苦樂由來爭一念。

受苦諸魂出獄難。  
青蓮原植沸湯間。

## 第七章

恩愛牽纏解不開。  
於今撒手無沾滯。

一朝身去不相偕。  
直上靈山白玉臺。

## 第八章

富貴由來水上漚。  
蓮池有箇收心法。

何須騎鶴上揚州。  
靜裏時吟七筆勾。

## 第九章

花落花開又一年。  
打開名利無拴鎖。

人生幾見月常圓。  
烈火騰騰好種蓮。

## 第十章

心境從來要廓清。  
靈山無限逍遙處。

休教煩惱日相侵。  
功德池邊洗六塵。

## 第十一章

休教六賊日相攻。  
悟得本來無一物。

色色形形總是空。  
靈臺只在此心中。

## 第十二章

心外求經路便差。  
真空妙義君知否。

水中月影鏡中花。  
七寶莊嚴總欠佳。

### 第十三章

風旛動處總非真。  
解得拈花微笑意。

自在如如只此心。  
本來何地著纖塵。

### 第十四章

流光迅速苦蹉跎。  
撒手懸崖無別法。

名利牽纏似網羅。  
白蓮臺畔禮彌陀。

### 第十五章

經營世故日忙忙。  
識得本來真面目。

錯認迷途是故鄉。  
此身原是臭皮囊。

### 第十六章

元宵燈後便無燈。  
朗照諸入終不滅。

萬古常明只此心。  
一龕佛火月三更。

## 第十七章

見美如無在一心。  
防閑女色如防賊。

莫將勾引怨摩登。  
外寇何能奪主人。

## 第十八章

望鄉臺畔尚思家。  
縱有紙錢無處使。

月慘風淒冥路斜。  
都緣一點念頭差。

## 第十九章

森羅殿上鬼多般。  
識得如來真實義。

白沸油鑊萬刃山。  
無邊解脫一時間。

## 第二十章

陷溺沉迷已有年。  
持經自可登高岸。

愛河滾滾浪滔天。  
何用中流更覓船。

## 第二十一章

塵緣斷後自消融。  
佛即心兮心即佛。

清淨方知色是空。  
青山只在白雲中。

## 第二十二章

聞說西方種異蓮。  
靈臺自有祇園樹。

花開十丈藕如船。  
本地風光即佛天。

## 第二十三章

嬌姿原是粉骷髏。  
一旦無常歸冥路。

暮樂朝歡總不愁。  
夜臺難逞舊風流。

## 第二十四章

聚寶為山未足奇。  
金剛明示成真路。

不如持誦得菩提。  
何事亡羊泣道歧。



## 第二十五章

諸佛菩薩只此心。  
世間點燭燒香者。

何須泥塑與裝金。  
笑倒慈悲觀世音。

## 第二十六章

了悟猶如夜得燈。  
此身不向經中度。

無窗暗室忽開明。  
更向何方度此身。

## 第二十七章

解惡猶如治亂絲。  
若教錯用些兒力。

寧心自有得開時。  
萬劫牽纏沒了期。

## 第二十八章

日夜無休只認真。  
誰知一赴泉臺路。

略差些子便相爭。  
悔把恩仇抵死分。

第二十九章

鐵面閻羅不徇情。  
試從孽鏡臺邊看。

剉燒春磨實難禁。  
地獄何曾見好人。

第三十章

陷入汙泥久不回。  
一朝得證菩提願。

西江難洗垢形骸。  
鐵樹奇花處處開。

第三十一章

北邙山下列墳塋。  
長臥泉臺人不醒。

荒草迷離怪鳥鳴。  
桃殘李謝過清明。

第三十二章

佛說波羅密妙經。  
註成人鬼齊超度。

前無千古後無今。  
功德如天莫比倫。

## 西方寶筏

金剛經心經。傳之中華。千百年矣。

得純陽呂祖師。以解儒書之法解之。條分縷晰。大義了徹。不復爲野狐堂參之說所障。乃諷誦之下。因了徹文義。而復有疑焉。蓋心經是揭金剛經之妙諦者。自照見句至無智無得一大段。皆已證菩提之效驗。於中空五蘊。守六根。絕六塵。固爲切要。似非般若波羅密之本旨。

即呂祖師亦講菩薩諸佛。依此五字。爲修行之法。無奈質魯根鈍。雖虔誦千百遍。未能通曉其義。謹再焚香百拜。跪伏

渡師張德操真君前。哀求大發慈悲。不惜教誨。開導弟子。恩同高厚。蒙示。此五字我本知之。因汝所求不誠。故未直說。此五字者。是

佛祖真傳心印。乃大定大靜之妙法。不須求解。只常常念誦。凡有所求。無不如願。汝當早晚焚香。時時虔誦。可感

佛祖。可除苦難。可拔祖父。可生智慧。可到彼岸。可渡幽魂滯魄。所謂真實不虛者。此心印也。敬謹受之。聞訓。即默誦心經一遍。而全經神理皆露。真妙諦也。復焚香百拜。叩謝 鴻慈。越三日 渡師又示。五字中可減二字。更爲便捷。故三十二偈中。特爲拈出。此又訣中之訣。妙中之妙也。竊思此等妙訣。匪惟修士當遵。即妖魔邪怪。得而修之。亦可以成正果。爰不敢私。謹附經後。用廣

大士普渡之化。而 渡師傳授之德。將與二經並永。感戴微弟子一人已也。若有善男信女。依法修持。酌水焚香。如對佛祖。如親

大士。毋起妄心。毋生雜念。遊思閑情。悉皆掃除。一念規中。至誠勤誦。無分境遇。刻不離心。勿希近效。勿墮初志。行深功多。坐證菩提。此訣爲西方寶筏。人天胥度。倘生侮慢。罔顧神鑒。甘自暴棄。不無罪過。

受業弟子喻梅謹識。

## 節錄

呂祖師三品經釋教原委一段以闡是經真法實效

釋教清微。肇於浩劫。觀空以空。虛無寂滅。昔有至人。名曰然燈。立於中古。轉大法輪。教化度脫。無量衆生。佛傳始盛。次有佛出。號釋迦文。自種民天。降神瞻部。是時周昭。甲寅之歲。西印度國。有迦維衛。其國王者。名曰淨梵。四月八日太子斯誕。三十二相。八十種好。以夙願故。舍國修道。雪山六載。精思苦行。鵲巢於頂。藤穿膝脛。臘月八日。睹明星出。豁然超悟。具六通識。負龍象力。開來繼往。闡教西域。初於鹿苑。繼祇陀林。黃金佈地。佛教崇興。四十九年。應化不一。是時比丘。暨比丘尼。並優婆塞。與優婆夷。凡數千人。俱同聽法。無不得度。有舍利佛。智慧第一。佛嘗因之。宣說法要。有大弟子。名大迦葉。得佛心印。傳佛正宗。佛親授記。是為初祖。又有弟子。名阿難陀。多聞第一。於佛滅後。傳佛教典。流佈人間。今之

佛藏。皆所宣傳。延及達摩。以大神通。一夕收攝。三十六處。邪魔外道。設洪誓願。自西印度。歷恒沙河。至南瞻部。說法演教。宗門大展。授秘密旨。從超悟得。明心見性。佛法無多。一切掃除。片言隻字。參悟本來。凡諸聰明。聞見知識。杜絕不事。渾渾默默。頡撼音領宗旨。悟諦因緣。無無所無。空無所空。內觀此心。如虛空際。如千江月。如鏡如泡。如花中香。如是空空。以無無空。故無所執。一字之妙。通達無礙。前無無前。後無無後。匪由聞見。玄覽超忽。任諸見聞。頽然自喪。以因緣故。得無因緣。禪宗乃熾。又有歷代。諸大法師。通經律論。取大法藏。闡譯文字。搜剔妙蘊。傳諸三千。大千一切。閻浮提界。廣為衆生。說無量因。解諸煩熱。化清涼境。拔諸苦惱。離火宅厄。濟諸幽魂。脫地獄趣。化諸六道。獲天人樂。利賴無窮。象教以昌。流傳既久。厥旨無聞。凡彼緇流。罔得真傳。東西剽竊。言語為宗。機鋒相對。口舌爭雄。所謂禪者。闡演秘典。認本來

面。無用浮飾。若究厥弊。貽害後人。迷失真宗。累主人翁。出居故舍。入無何有。渺茫漂泊。墮野狐禪。迷罔狂悖。阿佛罵祖。儼大知識。抑又甚者。謬妄罔悟。以譌傳譌。譌以譌承。我佛如來。法法何法。為究本根。故空諸法。文字不立。非去文字。恐後學流。求文字中。昧失本根。故去文字。豈知文字。正難盡去。去文字者。曾何沿流。但執文字。作文字觀。弗從文字。究佛秘旨。離失真宗。是文字障。斯害道矣。更可憫者。罔知是經。是佛心印。傳流人間。為彼衆生。廣為說法。俾有解悟。即彼下等。愚暗不明。資經懺悔。原令此輩。生恭敬心。朝夕諷誦。久或生明。了生死念。力諸善行。脫輪迴趣。或悟精微。超諸上乘。非第口誦。無悔悟心。便可宥罪。即假口誦。亦獲利益。是彼誦時。生大歡喜。高吟朗詠。令諸幽明。一切衆生。邪魔異類。幽魂餘孽。得聞是經。普沾勝利。咸蒙濟度。非說是經。但假口誦。無持受心。無恭敬心。無誠信心。無踊躍心。無均利心。

無無私心。乃為誦經。乃獲功德。自流日下。日下日壞。一切佛典。指為衣食。誦經之家。以虛文求。誦經之人。以虛文應。一切衆生。以虛文故。故輕是經。而諸佛法。罔有存者。要知是經。具大解脫。如廣陵散。化諸煩燥。如摩尼珠。化諸煩惱。如般若船。度諸溺者。如波羅密。生諸津液。如漆室燈。燭諸幽暗。具此種種。無量利益。但作文字。草草看過。便如糟粕。曾無所賴。以故禪宗。知此等故。掃除一切。冥心內觀。空內外相。寂坐玄默。領一參頭。究極旨趣。有歸於空。空無所空。以無空故。乃明斯旨。若住暗室。張一焰炬。無物不見。無不明朗。罔所障礙。無障礙故。心體俱備。性天完足。與天地俱。不為物囿。不有於物。斯之為梵。梵音清徹。幽明交濟。斯之為禪。禪理淵微。天人悉究。究厥旨者。佛菩提種。如是如是。西來大意。作如是觀。佛法盡矣。



跋

昔然燈佛。崇興佛教。未嘗有此金剛經。然爾時成佛者。皆賴師傳口授。渡秘密之旨。得其傳者。罔不成佛。至釋迦佛。誓願洪深。普度一切。發廣長舌。對眾宣說。不但不秘。且恐人不信。故反復宣示。究極精微。務使人人了徹。個個圓成。其功德如天。其渡人如筏。登之者。未有不到彼岸也。第傳至中華。譯者未免不實。歷代註者。又不得其真詮。以故東土成佛者寥寥。今有呂祖師之直解。而全經無遺義矣。亦佛門一大快事也。門下士喻梅。又從而校正。於音韻未諧者正之。且增附西方寶筏。及和尚解。皆所以羽翼本經。而經中之秘密諦。揭之如日麗中天。罔有不明者。此本刊行。必有尋文究義而入室成功者。量不少也。張萬泰謹跋。

千手千眼觀世音菩薩廣大圓滿無礙大悲心陀羅尼三稱

南無喝囉怛那哆囉夜耶 南無阿唎耶 婆盧羯帝爍鉢囉耶

菩提薩埵婆耶 摩訶薩埵婆耶 摩訶迦盧尼迦耶 唵

薩皤囉罰曳 數怛那怛寫 南無悉吉栗埵伊蒙阿唎耶 婆

盧吉帝室佛囉愣駄婆 南無那囉謹墀 醯利摩訶皤哆沙咩

薩婆阿他豆輸朋 阿逝孕 薩婆薩哆那摩婆薩哆那摩婆

伽 摩罰特豆 怛姪他 唵阿婆盧醯 盧迦帝 迦羅帝

夷醯唎 摩訶菩提薩埵 薩婆薩婆 摩囉摩囉 摩醯摩醯

唎駄孕 俱盧俱盧羯蒙 度盧度盧罰闍耶帝 摩訶罰闍

耶帝 陀羅陀羅 地唎尼 室佛囉耶 遮囉遮囉 摩摩罰

摩囉 穆帝隸 伊醯伊醯 室那室那 阿囉滲佛囉舍利

罰沙罰參 佛囉舍耶 呼嚧呼嚧摩囉 呼嚧呼嚧醯唎 娑

囉娑囉 悉唎悉唎 蘇盧蘇盧 菩提夜菩提夜 菩馱夜菩

馱夜 彌帝唎夜 那囉謹墀 地唎瑟尼那 波夜摩那 娑

婆訶 悉陀夜 娑婆訶 摩訶悉陀夜 娑婆訶 悉陀喻藝

室皤囉耶 娑婆訶那囉謹墀 娑婆訶 摩羅那羅 娑婆

訶 悉囉僧阿穆佉耶 娑婆訶 娑婆摩訶阿悉陀夜 娑婆

訶 者吉囉阿悉陀夜 娑婆訶 波陀摩羯悉哆夜 娑婆訶

那囉謹墀 皤伽囉耶 娑婆訶 摩婆利勝羯囉夜 娑婆  
訶 南無喝囉怛那哆囉夜耶 南無阿唎耶 婆盧吉帝 爍  
皤囉夜 娑婆訶 唵 悉殿都 漫哆囉 跋駄耶 娑婆訶

# 觀音大士咒

南無大慈大悲救苦救難廣大靈感觀世音菩薩三稱

南無佛。南無法。南無僧。南無救苦救難觀世音菩薩。怛只哆。

唵。伽囉伐哆。伽囉伐哆。伽訶伐哆。囉伽伐哆。囉伽伐哆。娑婆訶。

天羅神。地羅神。人離難。去聲難離身。一切災殃代爲塵。

南無摩訶般若波羅密。

# 呂祖直解金剛經



▲本社備有聖賢雜誌（雙月刊）  
免費贈送，歡迎來信索取。

發行者：

財團法人臺灣省臺中聖賢堂  
聖賢雜誌社

贈送處：

財團法人臺灣省臺中聖賢堂  
聖賢雜誌社

堂址：

臺中市北區美德街十八巷九號

電話：

（〇四）二二三二三七六四

傳真：

（〇四）二二三五〇三四八

郵政劃撥：

〇〇二六五九四二  
聖賢雜誌社

贈送處：

財團法人臺灣省烏日天德宮

宮址：

臺中市烏日區九德里中山路一段144號

電話：

（〇四）二三三七二〇九三

傳真：

（〇四）二三三八八一二五

